

禮

書

通

故

喪服通故一

禮書通故弟九

定海黃以周述

易傳古者喪期無數記三季同篇至親以期斷三季爲加隆以周案古謂上古虞書有喪考妣三載之文是喪期加隆已定亏堯舜以疇

吳廷芻云諸經皆言三季之喪惟小戴記乃有二十五月而畢之說至今竝從之唐王元感主三季非二十五月之說張柬之據春秋駁之但春秋多變制恐亦非古法蕭山毛氏曰以二十七月之服而謂之三季是欺父母也愚謂喪服自期至總皆月之實數獨三季則以二

十五月畢之本自可疑又漢文帝作短器之俑其以日
易月也則言三十六日而不言二十五日漢時古制未
亡其三十有六之數必有所自來以周案荀子戴記公
羊傳竝云二十五月兩漢諸儒竝無三十六月之說毛
吳諸人逞臆滅古不足爲訓張柬之議竝引尙書儀禮
不傳據春秋漢文短器三十六日之制亦在旣葬之後
劉貢父言之詳矣未葬以再則服斬衰如故安可據此
爲古禮三十六月之證

記中庸言父母之喪無賢賤襍記言大夫爲其父母之
未爲大夫者如士服士爲其父母之爲大夫者如士服

說者謂二記言別當從中庸以周案中庸父母之喪無
賢賤承上文三季器言器期無賢賤之別器儀有士大
夫之變二記不悖 又案漢河間獻王尋古禮五十六
篇內十七篇與高堂生同而增多三十九篇多言天子
諸侯卿大夫之制雖不能備猶愈倉等推士禮而至亏
天子說見漢藝文志則禮經以士器禮名篇當與天子
諸侯卿大夫有別以後世推士禮亏天子故事多從同
學者不可因禮逸無攷見并疑禘記之文也今以禮之
可見者言之士器枕由大夫則枕草士器斬衰三升大
夫則粗衰縷如三升半見本節鄭注天子諸侯卿大夫

既虞受服士卒哭受服而虞卒哭月又異數見器服斬
衰章大功章鄭注天子諸侯之葬弁經葛服受服士則
斬衰麻經不受服見檀弓鄭注天子器車五乘襚皆有
飾士器惡車之幣無飾又無尾纛見巾車士器禮大夫
以上將大斂服弁士器冠見後子弁經條若鄭君說衰
衣大夫以上侈袂朱子呂氏說器冠天子十二梁親王
九輒皇孫七輒大夫士以例降此與經義似有難通不
敢引以爲證

鄭元云器服經天子以下歿而相器衣服季月親疏隆
殺之禮也敖繼公云此篇言諸侯以下器服郝敬云篇

內服制斷自大夫以下天子諸侯闕焉盛世佐云中庸
期之器達乎大夫三季之器達乎天子諸侯以上絕焉
期至亏爲高曾祖父母父母妻長子之屬則貴賤一而
已所異者或絕或降耳其不絕不降者則固無以異也
而是篇已具矣何闕焉以周案盛說申經注甚明

記檀弓言器服古者不降上下各以其親舊說古者謂
殷厭降之禮始亏周魏晉議禮家皆據周禮爲言摯虞
虞喜徐邈等說後世王侯不臣諸父昆弟則事异亏周
不尋以貴降且周始封之君尙服諸父昆弟而一代爲
大夫僂降旁親輕重顛倒豈禮意哉以周案後世封建

廢則厭降之例多不可行從古不降可也但其閒亦有
宜從周禮者勿以彼一害此一

鄭元云服之降有四品君大夫以尊降公子大夫之子
以厭降公之昆弟以旁尊降為人後者女子子嫁者以
出降賈公彥云公之昆弟有二義既為旁尊又為餘尊
厭敖繼公說公之昆弟卽厭降降止三品圖若璩說降
服有六鄭注外宜增餘尊降塲降以周案厭降者惟厭
其子故注云公子大夫之子以厭降旁尊之旁為昆弟
記曰旁治昆弟故注云公之昆弟以旁尊降但旁尊有
二義一為父之昆弟昆弟為旁父為尊傳所謂世叔父

旁尊也不足以加尊焉其服報不降一爲己之昆弟有
爲公者昆弟爲旁公爲尊注所謂公之昆弟爲旁尊降
是也記曰大夫公之昆弟大夫之子亏兄弟降一等文
與小功章大夫大夫之子公之昆弟爲從父昆弟庶孫
合賈疏大夫以尊降公之昆弟以旁尊降大夫之子以
厭降例最明晰此疏以爲公之昆弟有旁尊餘尊厭二
降其說本亏大功章公之庶昆弟傳敖氏遂謂旁尊降
可併亏厭降殊不愆公子爲母妻有父在父沒之別大
功章公之庶昆弟本主公子立文其不曰公子者嫌同
父在也

喪服例父在稱公子
父沒稱公之昆弟

惟其義主父卒不能不曰

公之庶昆弟而其服爲公子父卒之服

欲以別父在無服也

故傳

以爲先君餘尊厭

又以別爲母妻期也

若小功章公之昆弟爲其

從父昆弟專主昆弟立文不關其父有何餘尊之足云

敖氏之誤實賈疏啟之矣降服四品不數餘尊降塲降

餘尊卽厭降旣謂之塲降義自明故鄭皆不數

又案

諸侯尊臣諸父昆弟故有旁尊降又有餘尊厭大夫之

昆弟無旁尊例大夫之子父在從父而降父沒無餘尊

厭又餘尊厭敖氏云厭死者或云其生者爲餘尊所厭

亦有二說

敖繼公云大夫不降祖與適聖人制禮使然非謂大夫

之意亦欲降此親而不敢降之也傳言大夫不敢降其祖與適似有害亏義理沈彤云聖人制禮皆緣人情謂亏其祖與適而以賢賢之義降之則其心必有所不敢故聖人不之降使其心之卽安也何嘗謂大夫之意欲降此親而不敢降乎凡傳之言不敢者皆當以此意推之以周案沈說是

喪服厭降之例或以賢賢厭或以尊尊厭並主君父言後世有厭姑厭嫡母之說鄭元云祖不厭孫姑不厭婦劉智云管魯穆姜在而成公夫人夢春秋書曰蔭我小君齊姜舊說妻隨夫而成尊姑不厭婦范宣云庶子爲

母三季嫡母雖賢然婦人無專制之事豈昇引父爲比而屈降支子也以周案孟子有王子母死傳請數月之器亦謂厭亏父也舊注亦誤禮公子器母練冠麻麻衣繚緣旣葬除之父卒爲母大功戴德器服變除云天子諸侯庶昆弟大夫庶子爲其母哭泣飲食居處恩慕猶三季也古人殺其文以從義申其實以盡仁如此厭嫡母之說未是厭姑有之詳下宗子母在爲妻禫節李如圭云凡大夫大夫之子不降者達亏天子以大夫爲尊降之始其子爲厭降之始舉以例其餘以周案李氏爲大夫之適子爲妻不降言之然非通例

喪服大功章傳因國君不服旁親而推言由卑別尊
由尊別亏卑以見尊有特申之義鄭元云傳因國君以
尊降其親故終說此義云是也楊復讀傳注不審而轉
斥之妄矣傳言公子之子孫有封爲國君者則世世祖
是入也不祖公子鄭元云公子若在高祖以下則如其
親服後世遷之乃毀其廟爾是也敖繼公說此自尊別
亏卑則始封君之時其祖考廟在故家自若也此亦謬
矣

公羊傳云喪以閏數喪數略也穀梁傳云閏月天子不
以告朔而喪事不數白虎通義云三季之喪不以閏月

數何以言其期也期者復其時也大功以下月數故以

閏月除何休云期三季之器始歿昇以閏數以閏為非月之餘故

昇繼非非歿月不昇數閏大功以下諸器當以閏月為

數鄭元云居器之禮以月數者數閏以季數者雖有閏

無與于數也以周案據白虎論及鄭志則公穀兩傳本

通而說穀梁者必謂大功以下亦不數閏固矣器不數

閏祥禫皆取正月吳商等必謂器取遠日祥逢閏用後

閏月過矣歿在閏月即數閏而附正亏非月范甯傳休

等必謂用閏之後月悖矣戴謚云閏別一月非以六十

日為一月也凶事遠日言月中之遠日若遷一月當是

遠月豈遠日之義邪閨在喪中略而不計祥除值閨外而不取重周忌也閨亡無正推以附奔喪期不闕順序不悖合禮變也

賈公彥云疏衰裳齊期者此章雖止一期而禫杖具有吳紱云此期固是有禫然亦有辨凡禫必主喪者主之母之喪父爲之禫故子從父而禫之若出母與繼母嫁而從者則已非喪主無禫也胡培翬云喪服小記云爲父母妻長子禫又云宗子母在爲妻禫唯言宗子母在爲妻禫則其餘父母在爲妻皆不禫可知也下傳云父在則爲妻不杖則爲妻禫杖亦有不專申者矣以周案

吳說是胡說未盡然

右總說

喪服爲父斬衰三季爲母齊衰三季此服之從子制之者也父在爲母齊衰杖期此服之從父制之者也唐制父在服母亦齊衰三季明孝慈錄父母之服皆斬說者疑古制服母以期與伯叔母無別宜汰後王以周案爲父三季非三季也三季之喪再期也加隆焉爾也至親以期斷故服母以期十三月而祥十五月而禫方之伯叔母又加三月矣而其心喪未嘗不三季也故爲父者達其子之心必三季而後娶或說服以表衷服斷以期而猶爲心喪斯亦僞而已矣抑知服其服而無其心斯

爲僞除其服而心猶器正以存其誠也奚僞焉方望溪云父在爲母期所以達父之情而非子之情有所殺僞父之事而亏子之事無所變也

疏齊衰三季章父卒則爲母賈公彥云父卒三季之內而母卒仍服期父服除後而母死乃尋申萬斯大云古人未嘗謂父服除乃尋申母三季賈說謬妄以周案經父卒則爲母萬氏以則爲急詞是也如賈說父卒服乃爲母則爲緩詞以鄭注攷之父在爲母齊衰五升既葬八升父卒爲母齊衰四升既葬七升服闋三季之器既練矣有期之器既葬矣注云爲父既練衰七升母既葬

衰八升則疏家父未卒服其服母用父在之制自本鄭義然不可從

杖期章出妻之子爲母徐邈云若但言出母嫌妾子亦服故言出妻之子明非所生不服也雷次宗云不直言爲出母嫌妾子及妾妻之子爲之服且子無出母之義故繫夫而言出妻之子放繼公說出妻之子主亏父在者也若父沒則無服高愈說此指父沒言父沒本應爲母三季出降爲期不敢欺死父也若父在而出母沒其惟心器乎盛世佐云該父存沒而言胡培翬云父不爲出妻服則子亏父在自不爲出母服明矣高說是以周

案曰出妻之子明非其所出之子不服亦主父在爲文也但父在猶卷出母則父沒可知敖高兩說皆偏出母者出而未嫁者也出母而嫁謂之嫁母無服 又案徐雷說嫌妾子爲之服謂妾子不服其所出嫡也若妾子爲其出母亦期敖氏駁徐雷說未達其意

傳出妻之子爲父後者爲出母無服成治云經爲繼父服者亦父後者也而服繼父服則自服其母可知也出母之與嫁母俱絕族今爲嫁母服不爲出母服其不然乎吳商云出母無服此由尊父之命嫁母父不命出何尋同出母又出母之黨無服嫁母之黨應服之步熊云

爲父後者釋服而祭可也以周案經爲繼父服爲嫁母服皆爲從母適人者言其爲父後而不從嫁者自無服也成說殊謬出母不自絕亏父嫁母則兩絕之吳說亦輕重失倫譙周謂父卒母嫁非父所絕是直以死父不能言爲可欺也或說出母父在則服父沒不服喪非

杖期章父卒繼母嫁從爲之服報傳曰賈終馬融云繼

母爲己父三季器畢嫁後夫重成母道故隨爲之服不

終己父三季器則不服也

馬義從訓隨終謂終器

鄭元云嘗爲母

于賈終其恩王肅云從乎繼母而寄育則爲服不從則不服崔凱云此爲庶子目爲父後者不服庾蔚之云王

順經文鄭附傳說崔卽情易安

崔今本
譌王

亏傳亦無礙繼

母嫁則與宗廟絕爲父後者安可以廢祖祀而服之萬
斯大云繼母不嫁則母子也嫁則路人矣奚服之有奚
爲父後與非爲父後之有縱身爲父後業從母往已不
能如常禮行爲後事其服自不容無果能如禮爲父後
則已克自立自不從繼母往矣不從又奚服哉以周案
經文從一字句傳云賢終終其撫字之恩也王義爲長
鄭云賢終其恩其義蓋同賈疏用馬申鄭未是周官媒
氏云凡娶判妻入子者書之判妻卽嫁妻夫妻爲判合
妻而嫁合者又判矣入子卽從母適人者必書之者觀

其終恩不也

鄭注釋判妻入子未是

又案敖氏云報者以其服

反服之之名謂出妻亏其子與此繼母皆報也盛氏云
上文出母不云報者以出母亏其子骨肉至親不因報
施而服故空其文如敖說報字總承兩節言如盛說報
字專承繼母言以下為人後者爲其父母亦言報例之
敖說可通

吳家賓云父繼娶則子已長非其骨肉安有從其他適
之理繼母之稱由繼父母改嫁易姓矣已雖從母欲但
名之爲母不可昇禮之慎名也從卽與繼父同居者兩
無大功之親謂之同居以其無主後故爲之主器而杖

以周案吳說繼母卽所生母因繼父而易名從卽同居說甚支離錄之以備異說

石渠議云問父卒母嫁爲之何服蕭大傳云當服期爲父後則不服韋元成以爲父沒則母無出義王者不爲無義制禮若服期則是子貶母也故不制服宣帝詔曰婦人上不簪舅姑不奉祭祀下不慈子是自絕也故聖人不爲制服元成議是也以周案出母有服爲未嫁也嫁則亦不服矣庾蔚之說嫁母與出母同制嫁而不服是子自絕亏母庾氏未諳大義今從宣詔

鄭元云嫁母齊衰期譙周袁準說父卒母嫁非父所絕

適子雖主祭猶立服期繼母嫁猶服期以親母可知故
無經也劉智云雖爲父後猶爲嫁母齊衰既葬卒哭乃
除踰月乃祭以周案鄭志云禮適子爲父後爲嫁母無
服子恩哭嫂爲位必非適子其注檀弓子恩之母死弓
衛云嫁母齊服期爲子恩非適子當服期也其意與石
渠議蕭大傳說同譙袁諸說不分適庶皆爲服期非特
與經記違亦乖鄭意

呂坤云出母而嫁兩相絕也出母不嫁爲父守也夫死
而嫁忘我父也繼母而嫁情又遠矣而皆杖期不無等
乎制禮者宜等焉 欽定義疏云經著出母之服大抵

為反在父室而不嫁者言也經無嫁母杖期之文其服者為己之從之旨則經原有等

記檀弓言伯魚之母死朞而又哭孔穎達說伯魚之母出父在為出母亦十三月祥十五月禫張載云此是父在為母之制當然疏以為出母者非以周案張子此說極是孔疏污聖大謬

記檀弓言孔氏兩世出妻有服不服或說禮出母杖期故孔聖使伯魚服出母子恩不使白也器之殊為失禮或說為父後者為出母無服孔聖使伯魚器之卻是變禮吳澄廼為孔聖子恩兩通之云伯魚以父在故尋為

出母服子恩兄歿使子上續伯父主祖與曾祖之祭則不敢服私親姜宸英云子上誠爲伯父後則子恩不當云爲伋妻爲白母子上既不爲伯父後安尋不服其私親江永云子之先君子器出母始指夫子之亏施氏而言非謂伯魚之亏卺官也叔梁公初娶施氏生九女無子此正所謂無子當出者家語後序謂叔梁公始出妻是也孔子雖有兄孟皮妾母所生則孔子實爲父後在禮爲父後者爲出母無服聖人以義處禮父旣不在施氏非有他故不幸無子而出實爲可傷故從其隆而爲之服設有他故被出則當從其污不爲之服矣以周案

禮經出母有服謂出而未嫁者也出母而嫁是謂嫁母
嫁母惟從者有服不從不爲之服也孔氏先代有爲出
母服者出而不嫁者也故曰無所失道出而不嫁禮宜
從厚所謂道隆從隆是也子上之母蓋出而改嫁者故
曰不爲伋也妻改嫁本可不服所謂道污從污是也其
云伋則安能者嘆其事有異亏先君子也其云自子恩
始者明後世拘執子恩之說而失之也先君子謂先代
之有賢德者其德本次子恩故孔氏不從先君子而一
守子恩之說如江說先君子爲至聖則孔氏斷從至聖
不從子恩矣如舊說至聖後屢世出妻斷非事實檀弓

子思之母死，子思母當佯妻涉下。庶氏之母而誤此爲出而改嫁之證。

喪服斬衰章子嫁反在父之室爲父三季。鄭元云：謂遭喪後而出者，始服齊衰期出而虞則受以三季之喪。受既虞而出則小祥亦如之。既除喪而出則已。敖繼公云：明其見出，亏父存之時也。箸之者，嫌與未嫁異。沈彤云：此文兼存沒言，敖是正解。鄭義亦當備。

孟子王子有其母死，其傅爲之請數月之喪。趙岐云：王之庶夫人死，迫于適夫人，不尋行其喪親之數，以周案總麻章。鄭注：君卒，庶子爲母大功；大夫卒，庶子爲母三

季士雖在庶子爲母皆如眾人王子父在厭亏父記公
子爲其母練冠麻衣縗緣旣薨除之傳曰何以不在
五服之中也君之所不服子亦不敢服也其傳請數月
之喪孟子謂是欲終之而不尋此之謂也其不尋終者
厭亏父不厭亏適母鄭注云諸侯之妾子厭亏父爲母
不尋申是也趙注誤總麻章賈疏云小君在則練冠五
服外小君沒其庶子尋申與趙同誤

喪服不杖期章公妾以及士妾爲其父母傳曰妾不尋
體君尋爲其父母遂也鄭元云然則女君亦有以尊降
其父母者與春秋之義雖爲天王后猶曰吾季姜是言

子尊不加亏父母此傳似誤矣郝敬云傳未嘗謂女君
可降父母也謂妾之父母若同凡人嫌妾自爲重服違
君自遂似乎不可曰今以國君之賢尙不厭妾此父母
之器所以爲重傳安昇誤盛世佐云傳明君不厭妾之
義與經合程瑤田云妾不尊體君兩條當以妾子比例
不當以女君比例妾之爲其子猶妾子之爲其母妾子
有體尊者之時而爲其母不尊遂之事其不與尊者爲
一體爲其母尊遂今妾不體君亦爲其子尊遂是其例
也又妾之爲其父母猶妾子之爲其外祖父母妾子有
體尊者之時而爲其外祖父母不尊遂之事若妾子本

不與尊者爲一體爲其外祖父母舅遂今妾不體君亦爲其父母舅遂是其例也以周案詳禮說

右父母服

齊衰三月章曾祖父母傳曰小功者兄弟之服也不敢以兄弟之服服至尊也鄭元云正言小功者服之數蓋亏五則高祖空總麻曾祖空小功也據祖期則曾祖大功高祖空小功也高祖曾祖皆有小功之鑒則曾孫元孫爲之服同也重其衰麻尊尊也減其日月恩殺也王肅云服本以期爲正父則倍之故再期祖亦加再故服期曾祖恩輕加所不及正當小功故傳以小功言之小功者兄弟之服是據祖父爲文也從祖祖父從祖父從

祖昆弟此三者其親皆從祖父而來也而已皆爲之小
功袁準云此統遠祖之言也十代之祖在堂則不可以
無服鄭子曰我高祖少皞摯之立也非五代祖也蒯瞶
禱康叔自稱曾孫非四代之曾孫然則高遠也無名之
祖希及之矣故不復分別而重言之也沈括云禮無高
祖元孫服先儒謂服同曾祖曾孫故不言可推而知或
曰經之所不言則不服皆不然也曾重也由祖而上皆
曾祖也由孫而下皆曾孫也苟有相逮者則必爲服喪
三月故雖成王之亏后稷亦稱曾孫而祭禮祝文無遠
近皆曰曾孫以周案曾孫以下皆稱曾孫高祖以上同

稱高祖經中言高祖者不一未有稱高祖爲曾祖者申
沈說者謂古無高祖之稱曾祖之名統上世未是經不
言高祖服者自曾祖以上皆齊衰三月鄭注曾孫元孫
爲之服同是也或說高祖無服鄭注總麻章已破之矣
開元禮曾祖父母齊衰五月高祖父母齊衰三月程易
疇主
高祖無服說凌
曉樓詳駁之

不杖期章女子子爲祖父母傳曰何以期也不敢降其
祖也馬融云出入服同故不言在室適人鄭元云經似
在室傳似已嫁明雖有出道猶不降李如圭云章首已
笄祖父母今重出之爲已嫁者生文沈彤云察傳意經

女子子下當脫適人者三字蓋化傳時固有之馬鄭注
時已脫以周案女子在室與男子同章首劉祖父母本
兼男女此復爲女子子別言之者與齊衰三月章首劉
曾祖父母下又言女子子嫁者未嫁者爲曾祖父母同
下章言嫁者未嫁者此不言者爲出入同服故舉則並
舉省則並省也傳言不敢降其祖與下章亦同沈氏據
傳言降遂謂經有適人者三字未是今從馬說凡女子
子亏正統之親禮不代降一等其爲父母期者屈亏不
貳斬也

齊衰三月章女子子嫁者未嫁者爲曾祖父母傳云嫁

者其嫁亏大夫者也未嫁者其成人而未嫁者也何以服齊衰三月不敢降其祖也馬融云成人謂十五以上許嫁未行者也以祖名冒明婦人雖爲天王后不降其祖宗也鄭元云成人謂年二十已笄醴者也賈公彥云女子子有未嫁逆降之理故因已嫁并言未嫁成人謂年二十已笄醴者若十五許嫁亦笄爲成人亦昇降與出嫁同敖繼公云此不降之服似不必言未嫁者經蓋顧大功章立文曰傳意謂嫁亏大夫者雖尊猶不敢降其祖然則與士妻異者乎又言成人而未嫁者與不敢降之意不相通似失其旨沈彤云凡女行亏大夫曰嫁

未嫁者蓋許字亏大夫者也逆降旁親惟字亏大夫者則然若適人者因無逆降之理嫁亏大夫字亏大夫皆賢也雖賢不敢降其祖祖至尊也未嘗不與上下意相通以周案傳成人而未嫁發在室有逆降之例舊說女子成人有出道卽未適人亦逆降或者議之沈氏因謂適人者不逆降惟字亏大夫則然敖氏疑經駁傳尤不足據經以女子有出降未出逆降之例故嫁者未嫁者並舉傳言嫁亏大夫正見不獨適士爲然也成人而未嫁者逆降旁親而不敢降其祖其意自順馬說季十五以上爲成人據內則十有五季而笄小記婦人笄而不

為塲之文鄭意器服十九以下為長塲二十乃為成人
賈疏兩通之甚是塲不塲以笄為斷而笄有先後二十
正笄十五許嫁亦笄

馬融鄭元說曾祖父母正服小功妻從服總不報盛世
佐云妻亦宜齊衰三月

右祖父母曾祖父母服

杜預段暢說天子諸侯三季之器始服齊斬既葬卒哭
除服諒闇以居心器不與士庶同禮以周案觀孟子載
滕文事知當時諸侯不能行三季器魯號秉禮亦已然
矣段暢與范宣難甚詳其所據皆為周之末失而誤定
為經通之禮攷之晉平公既葬諸侯之大夫欲朝見新

君叔向云以嘉服見則喪禮未畢以喪服見是重受弔
又周穆后既薨以喪賓宴叔向云非禮也三季之喪雖
貴遂服又魯莊公築王姬之館亏外時距桓公之夢已
十四月猶著衰麻穀梁傳云築亏外變之正也衰麻非
所以接弁冕也據斯以言則春秋時諸侯亦不盡既薨
除服矣范宣云能究變正之義始可與談春秋諒哉
喪服斬衰三季章父君傳曰至尊也記中庸云三季之
喪達乎天子以周案通典引戴德變除云臣爲君不笄
纚不徒跣餘與子爲父同君之亏先君一如子自漢文
景亏薨後三易服三十六日而除至魏武始令薨畢便

除燕三十六日之服後又直以三十六日爲除服之期而不論禭與否唐明皇又降三十六日爲二十七日喪期漸減亾古愈遠

斬衰章君傳曰君至尊也馬融云君一國所尊也鄭元云天子諸侯及卿大夫有地者皆曰君賈公彥云士無臣雖有地不尋君稱敖繼公說士有臣亦曰君以周案下經公士大夫之眾臣爲其君傳曰君謂有地者也鄭據彼傳爲文不舉士者士之有地絕少非公子及卿大夫宗子之爲士者不能有地有地亦尋俛君若無地者卽有臣亏士士不尋純臣而君之大夫亦然故孔子自

謂無臣不敢君門人原愬輩賈敖二說竝違君謂有地
之文

斬衰章公士大夫之眾臣爲其君布帶繩屨傳曰公卿
大夫室老士賢臣其餘皆眾臣也君謂有地者也鄭元
云公士卿士也公卿大夫厭亏天子諸侯故降其眾臣
布帶繩屨賢臣尋申不奪其正室老家相士邑宰也敖
繼公云士凡士之爲家臣者皆是經惟言公卿大夫傳
以有地者釋之則無地者其服不如是乎似失亏固矣
郝敬云公士諸侯之士公卿諸侯之卿公卿句大夫室
老士句皆爲賢臣以周案傳文公卿大夫卽經之公士

大夫士謂卿士鄭注據傳立訓亏義自順玉藻篇云上
大夫擯者曰寡君之老下大夫擯者曰寡大夫公士

句

擯則曰寡大夫寡君之老如彼文公士卽卿士故尋稱
君老玉藻又言大夫有所往必以公士爲正賓則公士
在太夫之上

舊說必與公士爲賓賓讀爲擯誤

與經之公士大夫立文

正合如郝說公士在大夫下固失經義且謂諸侯之卿
爲賢臣豈大夫卽非賢臣可降服乎近之說禮家竝從
郝氏亦未之審矣敖說之謬凌曉樓闢之云傳必以爲
有地者以賢臣之中有士也有采地者有邑宰復有家
相無地者直有家相而已今既有士則其爲有地之君

三
可知矣士不尋以凡士之爲家臣目之者以其賢亏眾
臣也賢亏眾臣故鄭以士爲邑宰也必邑宰而後可以
爲賢臣而不同亏眾臣

記服問君爲天子三季夫人如外宗之爲君鄭元云外
宗君外親之婦也其夫與諸侯爲兄弟服斬妻從服期
諸侯爲天子服斬夫人亦從服期王肅云外宗外女之
嫁亏卿大夫者也爲君服期以周案外宗之女亏君有
本服者宜服斬其無服者則從夫之服服期服問言夫
人如外宗之爲君襍記言外宗爲君夫人猶內宗義本
一貫王氏以外宗爲外女卽襍記鄭注所謂姑姊妹之

女舅之女而鄭此注與彼异者謂彼外女與君有本服
宜斬故亏此別以外親婦之無服者以明從服之期竊
玩本文不徑曰爲天子期而曲言之曰如外宗之爲君
是兼有服無服言之明其服有齊斬之別也周禮內宗
外宗是女之嫁亏卿大夫者亦兼有服無服言王說固
悖亏禮鄭說亦偏亏義熊安生謂外宗有三內宗有二
說尤舛錯

記襍記外宗爲君夫人猶內宗也鄭元云皆謂嫁亏國
中者也爲君服斬夫人齊衰不敢以其私服服至尊也
外宗謂姑姊妹之女舅之女及從母皆是也內宗五屬

之女也其無服而嫁亏諸臣者從爲夫之君嫁亏庶人
從爲國君以周案鄭注內外宗有親服服斬無親服嫁
從夫服或從國君服其義本明黃勉齋續通解采用此
注而增內宗五屬之女嫁亏庶人從爲國君一條徐健
庵讀禮通攷沿其說殊違經義注云五屬之女是亏君
有本親服者嫁亏庶人亦爲君斬何尋從爲國君其云
從爲國君者以五屬外之無親服言也

譙周賀循說內宗外宗之親在己國則尋爲君服斬夫
人齊衰若在他國則不尋也能安生說雖嫁在他國皆
爲本國諸侯服斬以周案鄭襍記注內外宗嫁亏國中

爲君服斬熊說與鄭不合

賈公彥云婦人不貳斬襍記云與諸侯爲兄弟者服斬是婦人爲夫并爲君尋二斬者此其常事彼爲君不可以輕服服君非常之事不尋決此也李如圭云男子爲君爲長子猶有斬服婦人則惟亏所天服斬故傳每連言婦人不貳斬以別之鄭氏謂內宗外宗爲君服斬非也服問曰君爲天子三季夫人如外宗之爲君也夫人爲天子期則外宗爲君亦期矣襍記外宗爲君夫人猶內宗也是內宗外宗之服不异也所謂與諸侯爲兄弟服斬者自爲男子生文婦人不貳斬何義而以斬服服

君乎爲夫之君自應服期其異者內宗外宗并服夫人
猶之仕焉而已者并服小君旨以周案凡女行亏大夫
以上曰嫁行亏士庶人曰適人不杖期章女子子適人
者爲其父母據士庶立文以該大夫傳連言婦人不貳
斬專指父言初不關君與爲人後者爲其父母傳言男
子不貳斬同亦止據士庶之女以該大夫而君之內外
宗其義自別如謂內外宗一從爲夫之君則與國人無
異旣屬可疑且或內外宗在家未嫁又將何服如以私
服服至尊則與不以戚戚君之義戾如依與君有服皆
斬之例則爲父爲君亦貳斬矣以彼決此疑竇滋益須

知器服傳所言原不爲君之內外宗者發不必泥也
大功章傳云始封之君不臣諸父昆弟封君之子不臣
諸父而臣昆弟始封之孫盡臣諸父昆弟舊說所不臣
者以其親服服之荀顗說大夫猶降其親則諸侯所不
臣者亦絕不服虞喜說大夫亦當從諸侯之例賈公彥
云亦既不臣當服本服其不臣者爲君當服斬以其與
諸侯爲兄弟者雖在外國猶爲君斬不敢以輕服服至
尊則此亦可知盛世佐說不臣者以本服服之所不臣
者爲此始封之君若子服亦如之疏云服斬非臣之則
臣服斬而君絕服矣林喬蔭云虞說非諸侯無降服臣

則絕之大夫不絕服止降一等使必俟三代爲大夫而後皆降則禮亏凡降服之文當言世大夫不尋止言大夫以周案記言與諸侯爲兄弟者服斬亦據不臣者言賈氏以彼例此亏義爲長

記檀弓公之喪諸達官之長杖鄭元云謂君所命雖有官職不達亏君則不服斬孔穎達云達官國之卿大夫士被君命者也遭君喪則服衰杖若府史之屬不達亏君不服斬衰但服齊衰三月目朱熹云達官謂尋自通章奏亏君者皆杖如大常卿杖大常少卿則不杖若大常卿闕則少卿代之杖徐乾學云當以朱子爲正如注

疏是諸達官杖非達官之長杖矣以周案官謂官職可
自達其職之長如卿大夫士之受命亏君者也鄭注四
制云七日授士杖謂為君器又注服問云士為國君斬
則後世太常卿太常少卿俱當為君服斬無不杖者
記襍記篇大夫次亏公館以終器士練而歸而器大記
篇則云公之器大夫俟練士卒哭而歸鄭元說練而歸
之士謂邑宰也練而猶處公館朝廷之士也器大記公
之器謂公士大夫有地者也其大夫士歸者謂繫在君
所食都邑之臣以周案三代异制儒者各據所聞不必
傳會鄭說朝廷之士亦次公館終器是也應鑄說非

何休云未踰季之君禮臣下無服示一季不二君也徐彥云喪服不杖章內有爲君之長子臣下猶服之況爲嗣君而言無服者以爲長子之時臣下從君而服其爲嗣君則無從服之義是以知其無服也且未踰季之君臣下皆爲弔君服斬甯舅更爲之服乎若還服期卽是廢重服輕若爲斬衰三季卽違一季不二君之義以周案未踰季之君無子而死當如何徐所云若有子而死而子嗣者雖值諸臣爲弔君服斬之時亦當有兼服變除之節故公羊傳曰未踰季之君有子則廟廟則書葬無子不廟不廟則不書葬立廟書葬斷無不服之理

未可泥亏一季不二君之例而概云無服

白虎通義云庶人爲君服齊衰三月天子七月而葬諸
侯五月而葬則民始哭絜服先葬三月成齊衰期月以
成禮葬君也鄭元云諸侯五月而葬而服齊衰三月者
三月而藏其服至葬又更服之既葬而除之蔡德晉云
天子諸侯未葬恐不應釋服沈彤云小記爲兄弟既除
絜已及其葬也反服其服此爲緩葬而服除者言則服
除亏葬之先者亦可例推又孔叢子子思曰期大功之
絜既除乃葬則服其所除之服以葬既葬而除之鄭注
蓋本此兩條以周案沈申鄭義甚覈白虎通語不明

鄭元云寄公爲所寓爲所寄之國君服郝敬云此衰世之禮以周案郝說非晉書禮志云新禮以今無寄公之事除之摯虞以爲周禮作周刑曆之時而著荒政十二禮備制待物不以時衰而除盛典世隆而闕衰教也摯說是

鄭元云庶人爲國君不言民而言庶人庶人或有在官者敖繼公云非在官與在官當家者不服褚寅亮云注意民之中卽有在官庶人亦止同民三月不服斬也故言或以包之敖氏誤會注意又謂非當家者不服尤謬以周案褚說是傳屢言與民同則齊衰三月明爲民之

木服

舊說不杖期章爲夫之君上下通制吳家賓云此士之妻從服大夫君也命婦服君當斬衰如外臣惟大夫臣士不敢并臣其家然後有從服夫之君者喪服之文皆以士爲正以周案此夫之君卽斬衰章之君鄭注斬衰章之君爲天子諸侯卿大夫之有地者此夫之君爲天子諸侯卿大夫甚明吳說非

喪服不杖期章爲君之父母祖父母傳云從服也父卒然後爲祖後者服斬鄭元云此爲君矣而有父若祖之喪者謂始封之君也若是繼體則其父若祖有廢疾不

立者父卒者父爲君之孫宜嗣位而早卒今君受國亏
曾祖賈公彥云趙商同己爲諸侯父有廢疾不任國政
不任器事而爲其祖服欲言三季則父在欲言期復無
主斬杖之宜未知所定荅曰天子諸侯之器皆斬衰無
期彼志與此注相兼乃具朱熹云儀禮注疏說已分明
天子無期器凡有服者必斬三季以周案傳曰爲祖後
者服斬爲經祖父母發也君服斬故臣從服期也注曰
今君受國亏曾祖爲經不杖期發也君之爲祖後者服
斬臣尋從服期者以今君受國亏曾祖其祖未嘗立也
若受國亏其祖則今君之臣卽祖之臣也臣爲其君自

斬矣庾蔚之申鄭志云祖爲國君五屬皆斬孫無獨期之義朱子弓宋孝宗之器昇鄭志此條亦淺服鄭君詳宋禮志及建炎以來朝野雜志然朱子謂天子之器有服必斬據宋事祖若父爲天子者言與鄭志尙合後人并謂君弓祖器不論父卒與否又不論父立與否皆服以斬非特非鄭君意并失朱子意矣近徐氏通考胡氏正義皆從劉績說祖父雖曾爲君旣老而傳嗣君從服期不斬與鄭朱之語竝違初不謂然然孟子嘗引書百姓器堯三載以爲驛攝之證又言驛旣爲天子矣又帥天下諸侯以爲堯三季器是二天子以明臣無貳斬之

義堯一日在舜一日攝不忍割先帝之餘歲以爲己季
孝敬之至也舜典曰徵庸三十在位五十載亦以二
十八載并器三季爲徵庸之季非卽位之季與孟子
攝之語合惟舜是攝故器畢復有避堯之子之事後世
上皇傳位予太子太子予明季卽改元行卽位禮
學者習聞其事遂誤讀尙書三十在位爲句矣 是則
太子攝位稱監國臣尋爲戍君斬爲位固戍君之位也
及其既卽位改元則臣爲今君之臣矣今君尋爲戍君
斬臣當從服期上以避二主之嫌下以明不貳斬之義
鄭志天子諸侯之器皆斬衰無期據見爲君而歟者言
卽斬衰章君是也此則今君爲其子若孫其父祖乃舊
君也君爲祖斬自當依傳父卒爲斷臣從服期不必拘
注不立之說矣經曰爲君之父母祖父母是其子明爲

君者矣子既爲君則臣之爲君之父母祖父母自應齊衰不杖期不必如鄭有廢疾不立之說傳曰父卒然後爲祖後者服斬明是此君承重亏祖父喪不應從鄭受國曾祖之言

記公之庶昆弟爲母大功公子之妻從輕而重爲其皇姑期而不見其臣爲之服崔光議據喪服厭降之例竝無從厭之文臣下宜服期亦從輕而重封偉伯議君服斬然後期君服大功安尋亦期也從服降一等未有君輕而臣服重者宜齊衰五月以周案禮君之母非夫人則羣臣無服是君厭服總臣降無服亦不從輕而重以

此推之封議爲長

器服齊衰三月章爲舊君有三節其一爲舊君君之母
妻傳曰仕焉而已者也鄭元云謂老若廢疾而致仕者
爲小君服者恩淡亏民虞喜云廢疾沈淪固同人伍齊
衰三月可也老而致仕臣禮旣全恩紀無替自應三季
仕焉而已者謂旣仕而太義同人伍旨以周案下經曰
在外則此爲身在本國者可知下經竝曰大夫傳意謂
君猶未絕則此爲仕焉而君絕者亦可知曾食其祿居
其國援國人之例齊衰三月不敢同見爲臣之服斬又
爲小君服不敢竟同亏國人 其一大夫在外其妻長

子爲舊國君傳曰妻言與民同也長子言未去也石渠
議云戴聖曰大夫在外者三諫不從而去君不絕其祿
位使其適子奉其宗廟故以長子爲文蕭大傳曰長子
者先祖之遺體也大夫在外不尋親祭故以重者爲文
鄭元云此在外待放已去者妻雖從夫而出古者大夫
不外娶婦人歸宗往來猶民也長子去可以無服鄭所
云案禮妻爲期而長子三年今夫雖在外妻尙未去恐
或者嫌猶宜期故言與民同則出國無服可知也所以
別言之者明夫旣去位妻偃同于民爾敖繼公云云舊
國君明妻子亦在外也傳似失之以周案大夫身違宗

國故曰在外此主大夫之妻長子言大夫服見下章非
大夫在外不自服也賈疏謂大夫在外其身不服非也
經云大夫在外則其妻長子在國可知其云舊國君者
主大夫在外立文非據其妻子言敖氏不信傳文遂謂
妻子皆在外誤鄭注妻雖從夫而出云云是據其從出
且有服以明其未去故曰雖一以見經妻長子主未去
言一以見傳補經意亏妻言與民同是可無論去不去
亏長子言未去則去不與民同服闋發經傳取爲精審
非若敖氏鹵莽滅裂也經舉長子者謂君不之絕因使
長子歸其宗廟而主其祀下傳言君歸其宗廟則大夫

既仕亏他國而長子亦太矣舉長子者以主祀宗廟也
戴次君之說是不然庶人居其國尙爲國君服豈獨大
夫之長子乎倘庶子遂無服乎白虎通義云臣待放亏
郊者冀君覺悟能用之所以言放者臣爲君諱若言有
舉放之也君不絕其祿者示不欲其去也以其祿三分
之二與之一畱與其妻長子使粁祭其宗廟賜之環則
反賜之玦則太此其義也 其一大夫爲宗子舊君傳
曰大夫去君埽其宗廟故服齊衰三月也言與民同也
何大夫之謂乎言其以道去君而猶未絕也鄭元云大
夫待放未去者以道去君謂三諫不從待放亏郊敖繼

公云云君埽其宗廟見猶望其復反之意所謂猶未絕者此也然則已絕者其不爲此服乎亦似與經意异矣以周案此卽大夫身違宗國者主大夫自服言經文大夫爲宗子舊君連讀傳文可據大夫以道去君而君不絕其采祿以代祭其宗廟故雖已仕他國亦爲反服或說已仕不服非傳云大夫去注言未去與傳違胡氏疏云大夫去與未去皆爲齊衰三月鄭特舉其一端曰總衰章諸侯之大夫爲天子傳曰以時接見乎天子卻馘賈公彥說諸侯之大夫不接見天子則不服射慈說諸侯之大夫有出朝聘之事會見天子故言時會雖未

曾見猶服此服士以下不服方苞說士從君朝覲遭大
喪無獨吉服之理胡培翬云士在王朝遭喪亦當如戴
德所云服白布淡衣縗冠而豈遂吉服乎

石渠論云戴聖云諸侯之大夫爲天子當總衰旣薨除
之大夫之臣無接見之義不當爲國君也閻人通漢曰
大夫之臣陪臣也未聞其爲國君也又問庶人尙有服
大夫臣會祿反無服何也通漢對日記云仕亏家者出
鄉不與士齒是庶人在官也當從庶人爲國君三月服
制曰從庶人服是也 右君服

喪服通故二

禮書通故弟九

定海黃以則述

喪服傳有傳重持重受重之語卽後世承重之稱所由始杜琬說孫攝一家之重居諸父之右祖無重可傳而孫以重自居亏義爲乖王敞說所重在先祖之體蓋非廢土財計之謂不賢正體而必云廢土忽其敬宗而重其財計此非義矣經有爲君之祖服期是爲臣從君服從服例降一等此則君爲祖三季矣旣爲君而有父祖之喪謂父祖並有廢疾不尋受國而已受位亏曾祖者也祖不受國無廢土可傳而猶三季斯蓋正統賢體之

義不必以覲土傳己也以周案傳云大夫有貳宗士有
隸子弟貳宗者何大宗小宗是也士未起爲大夫不尋
有大宗之名而五世內迭相爲宗隸其子弟固有小宗
之實所謂承重者承此五世宗適之重也喪服父爲長
子傳曰正體亏上又乃將所傳重也舊說以此長子爲
五世之適鄭注據小記不繼祖與禰以爲長子不必五
世則繼祖與禰之小宗亦有正體傳重之義矣是以制
服父爲長子三季爲眾子期祖爲適孫期爲眾孫九月
長子爲父後以杖卽位與眾子不同適孫爲祖後加服
三季亦與眾孫有別皆爲其正體又以傳重也凡爲後

者正體與傳重竝重其有正體而不傳重者

如適子有廢疾是

有傳重而非正體者

如庶子為後庶孫為後是

皆不尋加服三季惟

正體又將傳重乃為加服此為上下通制凌次仲力主杜說必有宗廟土地穀位人民而後謂之重五世則遷之小宗已為無重可傳如其說古立小宗法亦為過舉矣

鄭元說曾子問古者天子練冠以薤居蓋謂庶子王為其母無服服問君之母非夫人則羣臣無服惟近臣及僕隸乘從服惟君所服服也妾先君所不服言惟君所服申君也春秋之義有以小君服之者時若小君在則

蓋不可皇侃說小君沒則尋申其為父後者之總服若
小君猶在則其母厭屈故練冠賈公彥說曾子問所云
據小君在則練冠五服外服問所云據小君沒後其庶
子為尋申故鄭云申君是以引春秋之義母以子貴若
然天子諸侯禮同與大夫士禮有異也孔穎達說喪服
庶子為後為其母總是周法曾子問言古者天子是據
今而道再代以周案總麻章庶子為後為其母義通大
夫以上非庶子王為母無服或說大夫以上無總似庶子王不為其母服不知古
所謂絕服者絕其旁親之服耳說詳下如庶子王母不
不為其母服曾視成宮中之不若庶是禮也
厭子庶子練冠五服外厭亏先君非厭亏小君鄭云申

君亦謂申總非申三季也君服其母總故羣臣降一等
無服三月葬虞之後君有事則除服燕居則練冠以終
三季可也若直器之如小君是周之末失也時君行是
禮孔子亦從其實而書之說者遂以爲春秋之義鄭志
答趙商云春秋經其事著明但如事書之學者當按禮
以正鄭注是皇賈孔說皆非

異義云左氏說妾子爲君當尊其母有三季之器而出
朝會非禮也謹案禮妾母無服賢妾子不立而他妾子
立者也不敢以卑廢事尊者禮也賢妾子爲君義如左
氏鄭元駁云器服總麻庶子爲後爲其母此義自天子

下至庶人同不舁三季魯宣公所以舁尊其妾母敬嬴
爲夫人者以夫人姜氏大歸齊不返故也因是言妾子
立母卒舁爲之三季亏禮爲通乎以周案左氏家說庶
子爲君者母以子賢義同夫人穀梁家說庶子爲君爲
其母築宮使公子主其祭不舁致之太廟服以小君鄭
同穀梁亏禮爲合

賀循說庶子爲父後爲其母總庶子之妻自如常禮尊
所不降自天子達亏大夫孔瑚說庶子之妻不舁如禮
服其私親以身爲宗主奉脩祭祀故也凡婦服夫黨皆
降一等唯公子厭至尊故其妻從輕而服重盡禮亏皇

姑此不尋以公子爲例虞喜說庶子厭亏承重其婦當
依公子之妻綦母遂說公子不繼祖禰故妻尋申皇姑
夫人致齊而會亏太廟不宐踰至尊亦當服總麻以周
案服期則已重庶服則又輕綦母說從夫服是曾子問
注庶子王爲其母庶服其妻亦當從夫孔說庶子妻庶
服從此

劉寶說經庶孫爲祖三季之文小記云爲祖母三季謂
自庶後着人子以爲孫者爾喪服傳父卒然後爲祖後
者斬謂父亾乃下爲長子斬非孫上爲祖斬也王敞駁
之云小記祖父卒然後爲祖母後者三季此謂孫爲祖

後也言爲祖母三季祖父三季可知也如劉意小記當云父卒然後爲長子三季且養人子爲己孫與己自有孫豈異哉以周案王敞說是鄭注小記云祖在則其服如父在爲母也今律適孫祖在爲祖母服斬自乾隆閒吏部議睢州知州某始也

劉表說父亾在祖後則不尋爲祖母三季以婦人之服不可踰夫孫爲祖服期父亾之後爲祖母不尋踰祖也劉智說適孫服祖三季誠以父卒則己不敢不以子道盡孝亏祖也父卒則祖母當爲己服期己不尋不爲祖母三季成案說此則己受重亏父不受重亏祖不尋爲

祖母三季禮舅沒則姑老爲傳家事亏長婦也吳商說婦不踰夫經傳無據適行庶服義又不通齊衰章臣爲君之父母祖父母期臣從服期則君三季也此君受國亏曾祖不受國亏祖猶爲服三季則凡爲後者皆三季何必受重然後三季也粲說謬矣

賀循云父歿未殯而祖父歿服祖以期旣殯而祖父歿三季以未殯父尸尙在人子之義未可以代重也虞喜云如此則祖無傳重假使祖爲國君已爲適孫祖沒已嗣此受封亏祖羣臣服祖三季而已服一期齊衰送葬斬杖無主雖云尸在未忍如大父何庾蔚之云賀循所

記謂大夫士以周案不忍父必忍祖既忍祖矣父必不
安賀循所言卽指大夫士亦非

杜佑云庾蔚之謂適孫亡無爲後者今祖有眾孫不可
傳重無主次子之子居然爲傳重范宣議是也適孫已
服祖三季未竟而亡此重議已立正是不尋卒其服爾
猶父爲適居器而亡孫不傳重也次孫攝祭如徐邈所
答徐云一孫攝主本服如故若期既除當以衆服臨祭依心器以終三季何承天司馬操

竝云接服三季未見其據以周案此當以祖葬不葬爲
斷祖未葬而適孫亡又無適曾孫則次孫接服承重宜
如何司馬所說或疑服定亏初器之日甫已服期今不

當接服斬而更爲重制然據經子嫁反在父之室三季
鄭注謂遭喪而出者始服齊衰期出而虞則以三季之
喪受是服可再制明矣若祖已克葬則次孫攝祭當如
徐庾之說

譙周云禮庶子不爲長子三季不繼祖與禰也謂庶子
身不繼禰故其長子爲不繼祖合而言之也劉智說祖
禰兩舉之者明父之重長子以其當爲禰後也父以己
當繼祖故重其服則孫爲祖後者不卑輕也則爲庶祖
後者亦三季杜琬說庶祖無適可傳則非正體乎上傳
重之義旣無大夫士之位無適統之重而孫以重自居

亏義爲乖凡祖是庶而父爲長宜服齊衰庾蔚之說祖庶父適己繼父統而不謂之繼祖則祖當誰祭之所謂繼是承其後爲之祭故云傳重而服之斬以周案當從譙說參見宗法門

記小記爲慈母後者爲庶母可也爲祖庶母可也王仲邛云祖庶母不耐亏皇姑己受重亏祖當爲祭主不昇申其三季若受重亏父代而養爲後可也以周案義詳疏衰三季章慈母如母傳凡爲慈母者皆主妾子言適子受祖父之重不昇後慈母惟爲慈母後者己可以爲庶母後子亦可以爲祖庶母後此雖無傳重之名而昇

同爲後之服記意如此觸類言之庶子之適可爲生祖母持重服記曰祖父卒而後爲祖母後者三季義兼適庶宋王洙議誤

賀循云其夫爲祖曾祖高祖後者妻從服如舅姑孔瑚云假使元孫爲後元孫之婦從服期曾孫之婦尙存纔總麻近輕遠重情實有疑虞喜云有適子者無適孫孫婦亦如之又若爲宗子母服則不服宗子婦以此推元孫爲後若其母尙存元孫之婦猶爲庶不尊傳重傳重之服理直在姑矣庾蔚之云舅沒則姑老是授祭事子婦至亏祖服自以姑爲適所謂有適婦無適孫婦也

萬斯大云如庾言是一孫婦之身主祭則爲適服祖則爲庶義無一定且未聞夫爲適孫而妻不辱爲適孫婦者也故父歿母爲內主者惟子幼未娶者曰已娶未有不主重者也主重未有不從服者也縱姑總婦期止辱其常以周案此當以虞庾之說爲正喪服有適子者無適孫孫婦亦如之注云適婦在亦爲庶孫之婦明適不可有二也參見下宗子之母在則不爲宗子之妻服不杖期章爲人後者爲其父母報雷次宗云據無所厭降則期爲輕言報者明子亏彼則名判亏此故推之亏無尊遠之以報服女子雖受族亏人猶存父子之名故

尊加尊而降之以周案凡服之不報者以尊降也爲人
後者之父母報不敢以尊自居故雷氏云推之亏無尊
遠之以報服謂如世叔父母之亏昆弟之子以旁尊不
足加尊而報之也雷氏復以爲女子適人者猶存父子
之名尊以尊降其意爲人後者亏其所生無父子之名
也經曰爲其父母者欲著其服不尊不繫之其父母也
歐陽永叔等謂爲人後者亏所生不易父母之名以此
經爲依據時臣俱不以爲然惜未有據雷氏此義以折
之者然以經例言之曰女子子適人者爲其父母曰公
妾以及士妾爲其父母皆不易其父母之名何爲亏此

獨絕古人世叔父亏其昆弟之子尙有父子之稱何爲
亏此獨斬且降者推而遠之也報者引而近之也女子
適異姓其疏者也男子後大宗其親者也遠而疏者不
易父子之名其近而親者獨斬而絕之豈禮意哉程子
朱子以爲同堂共坐兩父其別竊謂天子之家君再名
父固未嘗有兩父之嫌士大夫家之俗稱曰爹曰爸亦
有可別者矣至臨文之稱當別之以官諡諡號段懋堂
以爲謂之本生父本生考可也此說卻未可據稱所生
曰本是二本矣

禮爲人後者爲其父母降一等而爲其祖父母無見文

王彪之崔凱等議女子子適人有歸宗之義故上不降
祖下不降昆弟之爲父後者今出後大宗大宗尊之統
收族者也故族人尊之百代不遷其父母報之期所謂
尊祖故敬宗也又曰持重亏大宗者降其小宗降其小
宗還當爲祖父母大功且雖在五服之外皆降本親一
等程瑤田夏斡說女子子出適不降其祖爲人後者亦
當不降其本生祖爲其祖父母服期爲曾祖父以上服
齊衰三月始協以周案爲所生祖父母期何以別所後
之祖乎程夏之說不可從 又爲人後者之子爲所生
祖父母亦無見文孔正暘等說爲人後者服所後之親

若子爲其本親降一等不言代降一等者以爲至其子以義斷不復還本親服故也賀循說爲出母齊衰而杖其子又不從服今出後者亏父母乃爲不杖期恐其子亦不辱反重也劉智說爲人後服本親不傷亏爲後者若子則其孫亦然矣本親有自然之恩降一等足以明所後者爲重無緣辱絕之矣徐乾學云父所後者爲疏屬孫竟無服以祖孫之至戚而等之路人母乃非人情乎以周案女子之適異姓者其子尙爲外祖父母服而男子之後同宗者其子乃可不爲所生祖父母服乎以此推之崔凱劉智說是賀氏擬以出母服不倫

喪服小功章爲人後者爲其姊妹適人者馬融云不言姑者明降一體不降姑也鄭元云不言姑者舉其親者而恩輕者降可知敖繼公云經亏爲人後者惟見其父母昆弟姊妹之服餘皆不見是亏本服降一等者止此親爾以其與己爲一體也自此之外正親旁親皆以所後者之親疏爲服不在此數矣以周案馬說失之厚敖說失之薄鄭注爲長經惟見父母昆弟姊妹之服餘皆不見下記云爲人後者亏兄弟降一等正補言所不見者亏兄弟服降一等是降不止一體矣賈疏爲人後者爲其昆弟云本宗餘親皆降一等是也段懋堂胡竹村

竝申敖說不可信傳記兩言若子竝謂亏所後之親若
子未嘗謂亏所生之親亦以所後之子服之也褚摺升
云如敖說本生正親皆以所後者之親疏爲服假使爲
疏屬之後則祖父母以上俱無服矣安乎否乎此說是
已

喪服記爲人後者亏兄弟降一等報段玉裁云兄弟二
字當作昆弟胡培翬云兄弟卽昆弟亏兄弟降一等
卽經所謂爲人後者爲其昆弟大功爲其姊妹適人者
小功是也不曰昆弟而曰兄弟蓋兼姊妹言之然降一
等之服已見亏經而記復言之者爲報言也以周案記

再後言兄弟服凡八見或該族親言或專指小功以下
言未有以之言昆弟者昆弟爲同父兄弟之定名兄弟
爲有親喪服之通名段胡二人信敖氏之邪說以爲爲
人後者亏其所生降一等服祇及父母昆弟姊妹餘皆
以所後之親疏爲服亏此兄弟例不合遂改經強說以
從臆見謬矣

喪服記亏所爲後之兄弟之子若子賈公彥云此等之
服已見斬衰章敖繼公云之子二字當爲衍文所後者
之兄弟皆如所後者親子之爲戴震說通典載賀循說
引佗亏所爲後者之子兄弟若子其所見記文未誤所

爲後之子者其女子子也程瑤田云所爲後之子設言所後者之眞子也眞子之兄弟小功以下之親今爲之服如眞子以周案斬衰章爲人後者傳補言爲所後者之祖父母妻妻之父母昆弟昆弟之子若子亏外親兼言昆弟昆弟之子亏本親祇舉祖父母妻故記補言所後之兄弟之子兄弟之子卽所後翁親期功兄弟之子也所後者無昆弟容有兄弟之子諸說皆非顧亭林合上節報字爲義大謬不錄其說

賀循云小記夫爲人後者其妻爲舅姑大功此謂子出時已昏若至所爲後家方昏不服本舅姑熊安生孔穎

達說夫爲本生父母期故其妻降一等服大功不論識
疇舅姑與否以周案熊孔斥賀當已亏夫所生父母仍
偁舅姑者猶喪服云爲人後者爲其父母也記言此者
嫌其妻或據所後者之親疏以服舅姑也凡爲人後者
其妻若子服其所生皆同此例後人有以所後者之親
疏爲服謬

右爲所後及其私親服

齊衰不杖期章爲昆弟之爲父後者何以亦期也婦人
雖在外必有歸宗曰小宗故服期也馬融云歸宗者歸
父母之宗昆弟之爲父後者曰小宗王肅云嫌所宗者
唯大宗故曰小宗明各自宗其爲父後者也敖繼公云

其亏爲父後者特重以其爲宗子也以私親言之故曰
小宗其昆弟雖繼別猶謂之小所以別亏夫家之宗也
以周案齊衰三月章丈夫婦人爲宗子是爲大宗服也
齊衰不杖期章爲昆弟之爲父後者是爲小宗服也大
宗與小宗別齊衰三月與期別敖氏提而合之固非以
繼別之宗爲小乃以大宗歸之夫家要屬無稽鄭注小
宗有四丈夫婦人之爲小宗各如其親之服此爲經外
補義

齊衰三月章丈夫婦人爲宗子宗子之母妻馬融云謂
一族男女皆爲宗子母與妻鄭元云婦人女子子在室

及嫁歸宗者也王肅云此謂族人無復五屬者反爲其宗子服也敖繼公云婦人謂絕屬之女子子在室者及宗婦也若在姢叔之列者則不服之以周案婦人指本宗女子不兼宗婦古義皆同爲婦人宗父不宗夫也敖氏之誤程易疇駁之詳矣王云此無復五屬者申其說者以爲五屬外齊衰三月其五屬內有期服者服齊衰期有功服者亦齊衰三月乃受以功衰以足其本服月數而止下記鄭注已詳之但本章明言無受安得有卒哭而受之事傳亦明言齊衰三月不聞有九月五月之服背經立義殊有未安林氏求義因謂經止言宗子未

管別其屬之親疏則是凡爲宗子不論其絕屬與否皆爲之齊衰三月惟爲宗子之塋始有親疏之異記宗子孤爲塋大功衰小功衰皆三月親則月算如邦人此專就塋服言之與成人服無涉以周謂記爲塋大功衰小功衰舉疏遠立文此曰丈夫婦人爲宗子亦遠之之詞鄭注大功章婦人子云因出見恩疏馬注小功章丈夫婦人云明疏遠故以遠詞言之可互證也王云此謂族人無復五屬者其義自正如林氏說豈齊衰期親亦可降而三月乎親如邦人自爲宗子通例但非先服齊衰三月再受本服如鄭所說耳林氏矯之過矣

鄭元云女君有以尊降其兄弟者父卒昆弟之爲父後者宗子句亦不敢降射慈譙周賀循說大宗子亦不降

季如圭云如鄭義則繼禰之宗子嫁者不敢以尊降若

大宗子案齊衰三月婦人爲宗子鄭謂女子在室及嫁

歸宗者則出嫁者不服以周案李氏申鄭是

傳曰宗子之母在則不爲宗子之妻服賈公彥云宗子父已卒宗子主其祭今宗子母在季未七十母自與祭母死宗人爲之服宗子母七十以上則宗子妻專與祭宗人乃爲宗子妻服也顧炎武云祭統云夫祭也者必夫婦親之是以舅沒而姑老明其不與祭矣雖老固嘗

為主祭之人而禮無二敬故爲宗子之母服則不爲妻
服以周案鄭注特性禮云主婦主人之妻雖姑在猶使
之主祭祀內則曰舅沒則姑老家婦所祭祀必請于姑
據鄭彼注亦姑老不限七十舅沒卽授祭于婦矣但
家婦卽尊主祭祀而必請諸姑則仍以姑爲主故宗人
猶服其母服其母則不服其妻者無二尊也賈疏以與
祭不與祭定服不服殊謬

馬融云五屬孫雖爲大夫不敢降宗子故服齊衰三月
尊祖故不降也李如圭云大夫不奪宗故也曾子問曰
宗子爲士庶子爲大夫以上牲祭于宗子之家小宗且

然大宗可知以周案經大夫為宗子謂大宗也李說是為宗子齊衰三月兼絕屬言馬說專指五屬未是

右宗子

大功章女子子嫁者未嫁者為世父母叔父母姑姊妹鄭元云舊讀合大夫之妾為君之庶子女子子嫁者未嫁者言大夫之妾為此三人之服也傳曰嫁者其嫁亏大夫者也未嫁者成人而未嫁者也何以大功也妾為君之黨服尋與女君同下言為世父母叔父母姑姊妹者謂妾自服其私親也鄭元云此不辭即實為妾遂自服其私親當言其以見之齊衰三月章曰女子子嫁者未嫁者為曾祖父母經與此同足以見之矣傳所云何

以大功也妾爲君之黨服尋與女君同文爛在下爾女
子子成人者有出道降刲親及將出者明當及時也賈
公彥云下言二字及者謂妾自服其私親也九字總十
一字既非子夏自著又非舊讀自安必是鄭君置之鄭
君欲分別舊讀者如此意趣然後以注破之秦蕙田云
傳文下言爲世父母廿一字當是注文而傳寫者誤大
書以連亏傳爾阮元云此二十一字乃鄭所引舊讀之
文與下此不辭相連皆爲注文而上節鄭注舊讀以下
三十二字當次亏傳文女君同之下一氣相連文義顯
然鄭引此舊讀而破之曰此不辭欲顛倒傳文也自寫

者誤分注爲兩截竄舊讀三十二字亏傳曰之壽而又
誤鄭注下言二十一字爲傳文遂爲學者大疑向使此
二十一字爲傳則舊讀甚是鄭若破之是破傳非破舊
讀矣鄭不言傳誤而但言舊讀誤是傳必不與舊讀合
矣以周案秦阮校傳下言以下二十一字爲注文良是
然據賈氏疏傳文女君同後本有爲世父母叔父母姑
姊妹十字舊讀以傳爲君之黨服兼庶子女子子言而
移此經文十字亏傳文後別爲一條故賈氏云爾鄭注
易傳不易經則女君同之下不宜有此十字淺人欲合
舊讀鄭注兩本而一之故竄之如此舊讀之誤在求合

亏傳鄭雖不言傳義有誤而云文爛在下明正傳文有誤矣阮氏謂舊讀不與傳合鄭不言傳誤非也其移經注亏傳下亦非鄭注下言以下二十一字此不辭以下七十一字竝宜連書亏女子子嫁者未嫁者一節經注之末其云女子子成人者有出道云云則傳注也傳亏未嫁之上特簪成人二字則鄭逆降之說亦未可遽斥矣古者女子年十五以上乃許嫁六禮行亏期年之中故許嫁卽有逆降之例非若後世髻年定婚也或者據後世之事而議古逆降之非所謂不揣其本而欲齊其末也

右世叔父母

鄭注原本

大夫之妾為君之庶子

注云云

女子子嫁者未嫁者為世父母叔父母姑姊妹

舊讀合大夫之

妾為君之庶子女子子嫁者未嫁者言大夫之妾為此三人之服也下言為世父母叔父母姑姊妹者謂妾自服其私親也此不辭即實為妾遂自服其私親當言其以見之齊衰三月章曰女子子嫁者未嫁者為曾祖父母經與此同足以見之矣傳所云何以大功也妾為君之黨服尋與女君同文爛在下爾

傳曰嫁者其嫁亏大夫者也未嫁者成人而未嫁者

也何以大功也妾為君之黨服尋與女君同

女子子成人者

有出道降旁親及時也出者明當及時也

鄭釐正本

大夫之妾爲君之庶子

傳曰何以大功也妾爲君之黨服尋與女君同

女子子嫁者未嫁者爲世父母叔父母姑姊妹

傳曰嫁者其嫁亏大夫者也未嫁者成人而未嫁者也

舊讀本

大夫之妾爲君之庶子女子子嫁者未嫁者

言大夫之妾爲此三

人之服也

傳曰嫁者其嫁亏大夫者也未嫁者成人而未嫁者也何以大功也妾爲君之黨服尋與女君同

爲世父母叔父母姑姊妹

謂妾自服其私親也

經婦爲舅姑齊衰不杖期劉岳書儀定婦爲舅斬衰三季姑齊衰三季明孝慈錄舅姑皆斬唐李荅李涪等議婦爲舅姑及女子適人爲其父母皆齊衰不杖期以婦人不貳斬也父母之器尙止周歲舅姑之服無容三季以周案人無二天亦無二斬故子非父不天父在則母降矣婦非夫不天從夫則父母皆降矣禮云婦事舅姑如事父母則以其父母之期服服舅姑亦云可矣且夫以三季而復寢婦亦俟夫終器不敢遽被綺紈之飾故曰與喪三季器不夭

魏仁浦議婦爲舅姑立定三季之喪三季之內凡筵尙
存豈可夫處苦塊之中婦被綺紈之飾夫婦齊體哀樂
不同求之人情實傷理本以周案晉荀訥說子婦爲姑
旣除器時人以夫家有器猶白衣是則婦卽除服其平
時亦未嘗遽被綺紈之飾亦用纖縞之服也至祥禫兩
祭時夫易朝服婦亦自服禮服小祥則夫婦皆凶服也
仁浦之議殊謬又唐李涪云婦爲舅姑十五月而禫禫
器案縗以絲爲之與綺紈何異云十五月禫
尤誤近儒多信李說亦未審矣 右舅姑服
記襍記宗子母在爲妻禫鄭元云宗子之妻尊賀瑒說
父在適子爲妻不杖不杖則不禫若父沒母存則爲妻

尋杖又尋禫凡適子皆然嫌宗子尊厭其妻故特云然
賀循說若非宗子其餘適母在爲妻並不尋禫以周案
場意母不厭子姑不厭婦嫌宗子母尊故記特言之循
意此惟宗子爲然其餘婦厭亏姑據器服傳宗子之母
在則不爲宗子之妻服襍記爲妻母在不稽顙是姑有
厭婦禮與鄭義合禫必杖杖未必禫場云不杖則不禫
亦未是

鄭元云適子父在爲妻不杖以父爲之主也服問曰君
所主夫人妻太子適婦父在爲妻以杖卽位謂庶子賈
公彥云自天子下至庶人父皆不爲庶子之妻爲喪主

故夫皆爲妻杖。尋申也。孔穎達云：或云適婦之喪，長子亦尋以杖祇不尋，卽位程瑤田云：杖期章妻傳曰爲妻，何以期也？妻至親也。此條下文不增一字，則是士庶爲妻，不論父在父卒，並杖期也。至不杖麻屨章，乃曰大夫之適子爲妻，則是爲妻父在不杖期，專爲大夫之適子特著一例。故傳問曰：何以期也？曰：父之所不降子，亦不敢降也。然旣不降，則當如眾人在杖期章。今乃移入不杖期，故又問曰：何以不杖也？因答之曰：此大夫父也。父在則爲妻不杖，若大夫卒則仍歸之，亏杖期矣。以周案大夫之庶子爲妻，父在大功，公子父在爲妻，在五服外。

皆不爲妻杖器服小記云父在庶子爲妻以杖卽位專
指士言賈疏非也鄭注引此者明父在適庶子有杖不
杖之別經杖期章妻主父沒爲文也父沒爲妻杖期大
夫之適庶子士之適庶子皆同鄭意如此其實杖期章
止言妻不分適庶亦無父在父沒之文不杖期章云大
夫之適子爲妻以父在爲文又止言大夫亦不通于士
蓋杖期章所謂妻通士之適庶及父之存沒言大夫之
適庶子父沒爲妻亦同其父在則適子不杖期庶子大
功則與士之適庶子異故下二章又別言之下二章簪
其別則此杖期章妻統其同可知矣但士之適庶子父

在爲妻皆杖期而有卽位不卽位之分器服小記云父
在庶子爲妻以杖卽位可也庶子可以杖卽位爲父不
主其器也適子之妻父主其器適子可以杖而不可以
卽位禭記云爲長子杖則其子不以杖卽位孔疏其子
長子之子祖在不厭孫其孫尋杖但與祖同處不尋以
杖卽位此士主適婦器適子尋杖而不以卽位正同茲
例孔疏所引或說甚合經意不杖期章傳云父在則爲
妻不杖專爲大夫之適子發固不關士禭記云爲妻父
母在不杖主大夫之子以上言亦非謂士之子器服小
記云世子其爲妻也與大夫之適子同世子謂天子諸

侯之適子天子諸侯大夫之適子父在皆不爲妻杖故
禭記云然而天子諸侯之適子不杖其妻必舉大夫之
適子爲言者明爲妻不杖期自大夫適子始其士固杖
期也鄭注謂士之適子不爲妻杖非特與禮經文不合
亏記文亦多戾程氏解經傳文最爲明順而駁者以爲
父主適婦之器旣杖其子不尋杖非也舅爲適婦大功
不杖

孔穎達云禭記爲妻父母在不杖不稽顙不杖屬亏父
在不稽顙屬亏母在范宣子云在有二義一者生存爲
在一者旁側爲在此謂在母之側爲妻不杖但父母在

三
之文相連爲一而父爲存存之在母爲在側之在於義
未安以周案范說固非孔疏亦未尋禭記下文別言母
在不稽顙則此母字衍也春官大祝疏兩引記云父在
爲妻不杖不稽首

石渠議云父爲長子以其爲五世之適也馬融云記言
庶子不爲長子三季不繼祖也明爲五世之適父乃爲
之斬也鄭元云小記言不繼祖禩則長子不必五世禩
服傳父爲長子言爲父後者然後爲長子三季重其當
先祖之正體又以其將代己爲宗廟主也但言祖不言
禩容祖禩共廟賀循虞喜庾蔚之說長子是四世之適

程瑤田云傳正體亏上言己與尊者為一體而為傳重之人也其長子適適相承是己所受之重將亏長子傳之故曰又乃將所傳重也注意以長子當先祖正體吾乃重之不合傳旨禰廟之重非庶子所尋受亦非庶子所能傳其長子烏尋繼祖哉傳重故繼祖不傳重故不繼祖服三季與不服三季繼祖不繼祖之分而已矣以周案長子為父後者之長子不必五世鄭注為是如戴馬諸義舍子而言曾孫未合經指器服傳正體亏上是正義又乃將所傳重是餘義凡為後者皆傳重而傳重不必三季惟長子正體亏上又將傳重故加以三季爾

鄭注正體就長子說又注下適孫云凡父亏將爲後者
非長子皆期甚合傳意胡氏正義反躋程說殊爲失察
齊衰三季章母爲長子記妾爲君之長子亦同萬斯大
云此專指宗子之妻非凡爲母者皆爲長子三季也庶
子不爲長子斬庶子之妻其服長子亦從庶子而殺當
與爲眾子不杖期同又小記云妾爲君之長子與女君
同則母之爲長子因父爲隆殺妾爲君之長子視女君
爲輕重可也以周案張橫渠疑經殊謬今從萬說又父
爲長子斬母爲長子齊皆三季若長子有廢疾不堪受
重宜如眾子不杖期詳見通典劉玠說孝慈錄父母爲

適子皆齊衰不杖期

雷次宗云父不以大夫之嚴降祖禰之主母亦安敢以婦人之尊降所天之適故曰父之所不降母亦不敢降如舊曰妻從夫服則當云夫所不降妻亦不敢降今言父母者豈非自子而言邪以周案傳不敢降謂不敢降其祖禰之正體鄭注本明雷氏所駁舊解誤以爲不敢降服敖氏因斥傳文不宐言不降種貶紕繆

敖繼公云塲小功章大夫公之昆弟爲庶子之長塲公之昆弟爲其庶子服與大夫同則爲其適子服亦三季與大夫同矣公之昆弟不繼祖禰者也而其服乃若是

則所謂庶子不尋爲長子三季者其誤矣乎以周案公之昆弟雖上無所承而身爲別子其長子爲繼別之大宗與尋常庶子之子自異鄭注公之昆弟猶大夫明其服子與大夫同例也敖說公之昆弟尋服長子三季是也但以是推凡爲庶子者爲長子服因斥傳記斯爲謬矣

不杖期章大夫之子爲世父母叔父母子昆弟昆弟之子姑姊妹女子子無主者爲大夫命婦者唯子不報石渠議云唯子不報言猶斷期不尋伸其服也鄭元云唯子不報男女同不報爾傳以爲主女子子似失之矣雷

次宗云報之爲言二服如一父母爲女子子適人無主者期女子子適人亦爲父母期與報相亂故經別其非報敖繼公云男子爲父三季與期服异故曰唯子不報盛世佐云男子爲父斬不在報中明矣女子子適人者爲其父之服與其餘十人同嫌亦在報中故辨之鄭譏傳失蓋未達斯意也上經云姑姊妹女子子適人無主者姑姊妹報而不及女子子是女子子不在報中之證夏斨云唯子不報單承姑姊妹女子子言之上節姑姊妹女子子適人無主者姑姊妹報則女子子不報已在言外此節特顯言之曰大夫之子爲世叔父母子昆弟

昆弟之子本隨大夫大功今因尊同加服期無所謂報也
以周案經唯子不報必兼男女而後其餘十人之相報
乃截然分明鄭釋經文本是傳惟舉女子子者嫌女子
子適人爲其父母期與報相亂故辨之雷盛之申傳亦
是也但下文又云其餘皆報似亏男子亦爲報矣故鄭
譏之其實傳所云其餘謂其餘十人亦非謂男子也
敖說非夏說較通 又子在昆弟之上舊說大夫之子
所生子敖繼公說此亏其子不別適庶以父在故目傳
曰有適子者無適孫郝敬說此世叔父之子也盛世佐
云子眾子也不言眾文省若適長雖不爲大夫而大夫

之適子服之當斬上斬衰章云父爲長子是也父以子在無適孫子不以父在無適子若世叔父之子禮經謂之從父昆弟在大功章大夫之子當降服小功若以尊同不降大功可矣豈反增之爲服期乎以周案子謂眾子盛說是敖氏謂不別適庶與斬衰章父爲長子文違却說更非大夫之子宜兼適庶爲是萬氏專謂適子章氏駁之傳曰父之所不降指父身之世叔父母子昆弟昆弟之子姑姊妹女子子言章氏卽指子所服之十二人程氏駁之說詳胡氏正義

大功章適婦傳云不降其適也敖繼公說不杖期章大

夫之適子爲妻傳曰父之所不降是亦服大功也亏庶婦降之而至亏不服方苞云庶婦服見小功章敖誤以周案大夫不降其適故爲適婦大功庶婦本服小功降之宜在總麻大夫無總故至亏不服敖說是不杖期章疏大夫爲庶婦小功失之方沿賈誤若適子有廢疾不堪受重雖適亦降適子如眾子適婦如庶婦喪服小記云適婦不爲舅後者則姑爲之小功是也禮適婦大功庶婦小功唐律加適婦不杖期眾子婦大功今律同禮適孫期適婦大功祖父母同今律祖父爲適孫期祖母大功祖父爲適孫婦小功祖母總皆與禮異

右妻子子婦服

受業鎮海梅開恩
從子家楠全校

喪服通故三

禮書通故弟九

定海黃以周述

不杖期章大夫之庶子爲適昆弟鄭元云兩言之者適子或爲兄或爲弟敖繼公云斬衰章父爲長子則大夫之適亦謂其長子未必指爲弟者也此以古之文法不可單言昆故連弟言之以周案宜從注如敖說是庶長不尋爲兄乎

大功章公之庶昆弟大夫之庶子爲母妻昆弟鄭元云昆弟庶昆弟也舊讀昆弟在下其亏厭降之義宜蒙此傳也是以上而同之賈公彥云舊讀謂馬融之等以昆

弟二字抽之在傳下鄭檢經義昆弟乃是公之庶昆弟
大夫之庶子所爲者父以尊降庶子則庶子亦厭而爲
昆弟大功以周案舊讀昆弟二字在傳下凌次仲以爲
在傳曰之下文既不順徐健庵程易疇從舊讀昆弟二
字併下皆爲其從父昆弟之爲大夫者其爲一條胡墨
莊云置昆弟二字亏下條之上則昆弟爲誰之昆弟亏
義無屬亏文不辭是也胡竹村以爲上屬下屬皆非當
屬衍文未是郝仲輿讀皆爲其從父昆弟之爲大夫者
又連上傳父之所不降爲文要誤

鄭元云皆爲其從父昆弟之爲大夫者皆者言其互相

爲服尊同則不相降其爲士者降在小功適子爲之亦如之李如圭云皆者皆公之庶昆弟大夫之庶子也敖繼公云此文承上經兩條而言則皆云者皆大夫公之昆弟大夫之子也以周案如李說則經宜見大夫之適子一條敖氏兼用鄭李兩說旣云承上而言而去經文兩庶字亦非

總麻章從祖昆弟之子敖繼公云爲族曾祖父族祖父族父族兄弟皆總其族昆弟固相爲矣此則族父報也餘爲旁親卑者之輕服略之而不報盛世佐云經惟見其一文不具也敖說非

大功章女子子適人者爲眾昆弟鄭元云爲眾昆弟父
在則同父歿乃爲爲父後者服期也盛世佐云此眾昆
弟凡不爲父後者皆是女子子適人者爲其昆弟之爲
父後者與大夫之庶子爲適昆弟同不必父歿乃爲之
服期鄭注非以周案大夫之庶子爲適昆弟期爲昆弟
大功俱從大夫服此則女子子以出降其親與不杖期
章女子子適人者爲其昆弟之爲父後者對文立義彼
傳文據父卒說賈疏已明之矣則此云眾昆弟當以庶
孫之例求之鄭注是胡氏正義反從盛說何邪盛氏又
謂眾昆弟兼女昆弟言尤誤胡氏已駁之

大功章姪丈夫婦人報鄭元云爲姪男女服同敖繼公云章首已見爲姑適人者之服此似不必言報報字非誤則衍盛世佐云姪丈夫婦人報與上宜合爲一節言女子子適人者爲此四等之親服而此四等之親亦以是服報之也丈夫男昆弟及姪也婦人女昆弟及姪女也上姑姊妹女子子適人者主丈夫言此則兼言婦人故復云報以明之以周案敖盛諸說皆非當從鄭章首姑姊妹節爲姪昆弟之丈夫婦人立文不言報故此節文箸姑爲姪丈夫婦人之文且言報以明之報者報之也凡言報者旁尊報卑之辭此與小功從母節文法正

同小功章丈夫婦人報謂從母報姊妹之男女此言丈夫婦人報謂姑報昆弟之男女馬注小功長殤節云丈夫婦人遠辭又注小功從母報云諸母報姊妹之子然則經遠之曰丈夫婦人而服以功服者正所以明報之義也自解者以此報爲卑報尊殊乖經例且與章首姑姊妹條意種義複敖氏因謂經有衍誤種馳紕繆凡經言女子子者本對父母爲文亦有對昆弟言者爲男子女子亦竝文也若姑義不尋稱女子子故經必曰姑姊妹女子子種案言之此節爲姑立文義不尋蒙上女子子是以鄭分兩節自盛氏謂兩節宜合徐氏通攷胡氏

正義從而和之而鄭義日晦矣

昆弟子婦之服經無見文王肅云父爲眾子期其妻小
功爲兄弟之子期其妻亦小功唐開元禮爲夫之伯叔
父母報宋政和禮爲兄弟之子婦爲夫兄弟之子婦竝
大功徐乾學云據顏師古等所奏則當時實服大功開
元禮爲夫之伯叔父母報云報者卽爲兄弟之子婦服
大功之明文也以周案禮適婦大功庶婦小功昆弟之
子與眾子同服昆弟之子婦宜與庶婦同服器服傳云
不杖期章世父母叔父母及昆弟之子夫之昆弟之子
竝云報小功章夫之姑總章夫之諸祖父母亦竝云報

獨大功章夫之世父母叔父母不言報則爲昆弟之子婦小功明矣如昆弟之子婦概報之以大功則反重己之庶婦服非禮意矣唐初服以大功本誤而魏徵顏師古等不正茲失反增適婦期庶婦大功以齊一之鍾虺紕繆程易疇謂夫之世叔父母經不見報文不爲之服亦非

右昆弟從父昆弟昆弟之子若婦

喪服記言兄弟服凡八見傳云何如則可謂之兄弟傳曰小功以下爲兄弟鄭元云大夫公之昆弟大夫之子亏兄弟降一等兄弟猶言族親也兄弟皆在他邦加一等亏此發兄弟傳者嫌大功以上又加也賈公彥說云

兄弟猶族親者下云小功以下爲兄弟恐此兄弟亦據小功以下尋降故曰猶族親也見大夫公之昆弟大夫之子亏兄弟及爲人後者爲兄弟等皆非小功已下猶族親所容廣也郝敬云親曰昆弟族曰兄弟婚姻異姓亦稱兄弟兄弟皆指小功以下盛世佐云兄弟所咳者廣凡旁親自期功而下及外親皆是周案喪服經傳之稱昆弟者皆同父兄弟之定名也其曰兄弟者旁親期功以下喪服之通名也記首章大夫公之昆弟大夫之子亏兄弟降一等上曰昆弟下曰兄弟明有別也大功章大夫爲世父母叔父母昆弟昆弟之子爲士者卽

記所謂大夫亏兄弟降一等則兄弟服上兼期親明矣
襍記祔兄弟之塲則練冠鄭注以爲大功親以下則大
功親固謂之兄弟也記兄弟皆在他邦加一等節義又
不尋兼大功故傳又以爲小功以下鄭注賈疏是也兄
弟爲旁親期功以下其行輩之尊卑不必與己同而亏
異族小功以下之親則又曰外兄弟服問云公子之妻
爲公子之外兄弟鄭注云謂爲公子之外祖父母從母
總麻孔疏亦引此傳而申之云公子之外祖父母從母
此等皆小功之服凡小功者謂爲兄弟以外族故併外
兄弟則所謂爲兄弟指族親言不尋兼外親亦明矣若

幷文之兄弟有兼昆弟者有兼外親者通言之不暇別也卷服經傳之外士卷禮之兄弟亦謂小功以下餘篇之兄弟多兼期功言之爾雅釋親屬弟兄弟之稱與卷服經傳同例至先生爲戴東原段懋堂從郝說以兄兄弟之子諸文又通言之弟爲小功以下之專名其義難通又謂昆弟則惟大功以上可稱亦誤凡稱昆弟皆據同父爲文其異父者經必加從父從祖以別之大功章有從父昆弟小功章有從祖昆弟總麻章并有族昆弟及從母昆弟則小功以下亦可稱之曰某昆弟與大功章稱從父昆弟正同其必以從某別之者昆弟惟同父可稱大功亦不尋濶也近人多爲戴說所惑惟胡氏正義辨此尙明

記不及知父母與兄弟居加一等傳曰小功以下爲兄弟鄭元云亏此發兄弟傳者嫌大功以上又加也大功以上若不及知父母則固同財矣賈公彥云父母有早卒者與兄弟同居而歿慈其幼孤相育特加一等夏旻云疏不然此不及知父母之子爲同居之兄弟加服一等非同居兄弟慈不及知父母之子爲之加服也以周案賈疏亦謂答其同居兄弟養育之恩也特語滯目

兄弟

記曾子問篇宗子爲塲而歿庶子弗爲後小記篇則云爲塲後者以其服服之舊說塲無爲人父之道故宗子

塋灰庶子弗爲之後而以本親之服服之或說以其服服之服之以爲後之服也小記之所謂塋指已冠婚者言故尋立後曾子問之所謂塋指未冠婚者言故不尋立後以周案由奔一說則是後塋者之父與小記爲塋後之文悖由後一說則小記上文言男子冠而不爲塋下卽繼以爲塋後者云云正指未冠娶者言是與記文亦不合也俞蔭甫先生云小記所說是天子諸侯之禮先君雖以塋卒而爲塋後者必服以父子之服如僖之繼罔是矣曾子問所說是大夫士之禮故南孺子生男而卒則季康子不必爲之後也

喪服傳不滿八歲以下爲無服之塲無服之塲以日易月以日易月之塲塲而無服故子生三月則父名之友則哭之未名則不哭也戴德說此謂父母爲子與昆弟相爲爾七歲以下至三月塲之以日易月生三月哭之葬圉既葬止哭不欲酒會肉畢喪各如其日月馬融王肅說以哭之日易服之月塲之期親則以旬有二日哭總麻之親則以三日爲制鄭元云生一月者哭之一日也塲而無服者哭之而已爲昆弟之子女子子亦如之遁弓嘗說期親長塲中塲俱在大功下塲小功無服之塲雖無容在總麻應有哭之垂大功下塲總麻無服

之塲則已遏絕總麻之長塲服名亦絕不應制哭故傳據期親以明之戴逵云如鄭義諸降之塲若復哭其生月則總麻長塲決不可二百數日哭鄭必推之亏不哭又非所允范甯云傳曰不滿八歲爲無服則八歲以上不當引此也尋制名之本意父之亏子下塲小功猶有總麻一階非爲五服已盡而不以總麻服之者以子及人次目束皙云總麻不服長塲小功不服中塲大功不爲易月哭惟齊衰乃備四塲焉劉敞云長子本服三年塲之二十五日餘子本服期塲之十三日以周案此傳本文明據父子子八歲以上下塲小功不滿八歲無服

傷之以日易月有筮其哭既擇除之與生三月者同三月以下未名不哭塋而無服者塋之言傷也傷不必哭不飲酒不食肉傷之也哭傷之甚也大戴所說甚合傳義但傳主子女子子大戴兼昆弟相爲爲少异目鄭注以易曰爲哭日又推廣之爲昆弟之子女子子亦如之馬王肅又兼大功以下皆誤大功亏無服之塋與小功亏中塋總亏下塋皆已無服何爲亏生三月者要制哭日且如馬王說三月以上七歲以下皆隄以十二日之哭少長旣無筮別八歲雖疏尋三月之服七歲雖親不及半月之哭則筮別又爲過當江震滄曾以此難馬王

肅而有取于鄭注沈果堂孔翼軒又駁鄭注謂逾月而
葬葬而卒哭成人之器猶或如此而猥令七歲之殯連
旬之外日日哭亦非禮意竊謂鄭以易日爲哭期非謂
日日哭不昇以此爲難鄭注固勝于馬王肅也

小功章傳大功之殯中從上小功之殯中從下總麻章
傳齊衰之殯中從上大功之殯中從下兩文相反鄭元
賈公彥說小功章發在從父昆弟丈夫下主丈夫服總
麻章發在婦人爲夫之親下主婦人服禮無殯在齊衰
者則所謂齊衰之殯大功之殯小功之殯並據服其成
人可知也總麻章庶孫之中殯中當爲下郝敬云小功

章以殯服權其中總麻章又以成人服權其重程瑤田說總章長殯中殯降一等四句皆經文總章之經據其成人小功章之傳則據其殯之本服大功乃齊衰成人之降者小功又大功成人之降者以成人之服言之所謂齊衰之殯中從上大功之殯中從下者以殯服言之則所謂大功之殯中從上小功之殯中從下也如此則總麻章庶孫之中殯無容改中爲下矣以周案兩傳文異自以參融爲安鄭注以丈夫婦人分說所謂齊衰大功小功之殯皆據成人本服爲言申之者謂凡殯若不就本服立文無由知其從何服而降也然如鄭注小功

之塲爲成人本服則成人小功長塲降一等已入總麻
有何下塲之服可爲中塲所從傳之立文不應如斯之
窒此鄭注之可疑者也程氏以總章長塲中塲四句爲
經文此其立說之大疏處近儒駁之者眾矣其以總章
成人齊衰之塲中從上爲大功卽小功章所謂大功之
塲中從上之塲服則總章成人大功之塲中從下爲總
麻而小功章據塲服立文當云總麻之塲中從下何復
云小功之塲此其立說之來密而反疏者也申其說者
又謂大功之塲小功之塲皆據本章塲服爲文則小功
章之下塲如昆弟之子女子子夫之昆弟之子女子子

其中殤在大功章又與中從下文戾矣要之禮無殤在齊衰者且齊衰之殤例傳又發之亏總麻章則所謂齊衰之殤中從上大功之殤中從下其以成人本服言無疑而小功章傳發殤例自據殤服立文而殤服有上中下之異齊衰之中殤與大功之中殤又有從上從下之別乃據其長殤服以明中殤之例齊衰之長殤大功服故謂之大功之殤而中殤不見者其例中從上大功之長殤小功服故謂之小功之殤而中殤又不見者其例中從下小功之長殤總麻服其不謂之總麻之殤者爲經有大功殤服小功殤服而無總麻殤服也經無總麻

殤服則成人大功之長殤固宜稱小功之殤卽中從下之入總麻者義亦不尋謂之總麻之殤傳曰小功之殤中從下語簡而當近儒異說甚繁不具辨

小功殤章大夫公之昆弟大夫之子爲其昆弟庶子姑姊妹女子子之長殤馬融云大夫以尊降公之昆弟以尊厭大夫子以父尊厭各降在大功長殤復降一等故小功也大夫無昆弟之殤此言殤者關有舉若喪厭溺當殤服之鄭元云大夫爲昆弟之長殤小功謂爲士者若不仕者也以此知爲大夫無殤服也云公之昆弟爲庶子之長殤則知公之昆弟猶大夫李如圭云大夫爲

昆弟之爲士者尊不同故降其長殤大功而小功也然則尊同者不降矣而大功章不見大夫爲昆弟之長殤者爲大夫無殤服也公子之重視大夫舊見大夫昆弟相爲期而公之昆弟相爲大功遂疑公之昆弟與大夫之尊不等此經大夫與公之昆弟爲庶子以下之殤服同則公之昆弟與大夫之尊不殊也以周案李氏申鄭明晰人之幼而有德行者不必二十爲大夫故大夫有昆殤

小功殤章爲姪庶孫丈夫婦人之長殤馬融云言丈夫婦人者明姑與姪祖與孫疏遠故以遠辭言之雷次宗

云大功章爲姪已言丈夫婦人今此自指庶孫言不在姪敖繼公云經凡三以丈夫婦人連文而所指各異讀者詳之程瑤田云經中丈夫婦人凡四見並指同姓者言婦人謂女子子在室者以周案當從馬注諸說皆非經言丈夫婦人凡四見皆指其本宗之親而遠之之辭無異悒也齊衰三月章爲宗子宗子之母妻遠之曰丈夫婦人而服齊衰三月者爲宗子也小功殯章之長殯遠之曰丈夫婦人而服小功五月者爲長殯也大功章姪小功章從母遠之曰丈夫婦人而服此大小功者爲報也其必加以遠辭者非遠之無以見尊宗殯長之情

與笄尊相報之義故也婦人兼嫁者未嫁者言若專指其在室者謂之婦人子

總麻章庶孫之中殤馬融云祖爲孫成人大功長殤降一等中下殤降二等故服總言中則有下文不備鄭元云中當爲下字之誤也王肅云此見大夫爲孫服之異也士爲庶孫大功則大夫小功降而小功者則殤中從上故舉中以見之以周案經文或竝舉長殤中殤或竝舉中殤下殤爲中從上亦可從下也其單舉者曰長殤曰下殤未有舉中殤爲文者故器服傳問者曰中殤何以不見也大功之殤中從上小功之殤中從下若總麻

章有中塲則傳不必發此問矣鄭注爲長如馬義與經中塲降一等文違如王義經不言大夫又嫌添說

徐乾學云三塲之制爲常人設豈有旣立爲大孫而可以塲論乎謝衡謂已誓不塲是已卞粹所駁已誓未誓之論大謬蓋未誓則猶然庶孫爾旣誓則將代已爲宗廟主當與成人同以周案喪服傳公爲適子之長塲注公君也諸侯大夫不降適塲者重適也天子亦如之天子諸侯大夫之適子皆有代主宗廟之事非常人也而箸之於塲大功章則謂大孫不以塲論非也謂已誓同成人而以期服服塲喪非也凌曉樓詳辨之矣至喪服

記宗子孤爲塲節鄭注所謂卒哭受以大功衰九月小
功衰五月合齊衰三月計之其文法與大功章三月受
以小功衰卽葛九月者同非謂三月外又加九月五月
徐氏又妄駁之凌氏譏其粗率洵然

右塲服

罷服小功章爲外祖父母傳曰以尊加也馬融云母之
父母也本服總以母所至尊加服小功敖繼公云子之
從其母而服母黨者當降亏其母二等母爲父母期子
爲外祖父母小功宜也非以尊加也以周案罷服記云
外親無過總麻母之父母亦外親也而爲之小功故曰
加馬說是敖釋從母亦用記文外親皆總而亏此獨違

記而駁傳妄矣

小功章從母總麻章舅袁準云姨舅同親焉尋異服從母者從其母而爲庶母也宣舒云二女相與行有同車之道坐有同席之禮其情親而比其恩曲而至由此觀之姊妹通斯同矣兄妹別斯异矣同者親之本异者疏之源也以周案從母與舅異服宣氏以其母之情親姊妹遠兄弟爲言朱子亦謂女子亏兄弟出降姊妹卻不降故姨母重亏舅竊謂女子子在室昆弟之恩未見有減亏姊妹故爲昆弟期爲在室姊妹亦期見不杖期章昆弟注其適人者昆弟降大功爲姊妹亦降大功竝見

本章明其親疏厚薄同也其子之服從母與舅異者服術有六三曰名從母小功傳曰以名加也以有母名故加至小功而舅不可以父名必同姓而後稱父古道然也袁說姨舅同服唐以來用其說其釋從母夏諤江震滄云如其說總章從母昆弟乃己之庶昆弟服宜大功何至降而在總唐貞觀中改舅服與從母同小功舅為甥總顯慶中始同從母報今律同

記服罔篇母死則為其母之黨服舊說母死其母皆謂己之生母陳湑云母死謂繼母其母謂出母以周案出母之黨無服見器服傳陳說殊舛

服問爲其母之黨服則不爲繼母之黨服鄭元云雖外親亦無二統江恩悛蔡講說再母之黨宜服 欽定義疏云禮外親亦無二統再母之子不服後母之黨則後子不逮事再母者亦如之也從服者所從亾則已再母既亾不從不亦宜乎已母出則服繼母之黨如繼母多則服在堂繼母之黨服其所從也虞喜以爲縱有十繼母唯服次其母者之黨非也

小功章君母之父母從母傳云君母在則不敢不從服君母不在則不服馬融云妾子爲之服小功自降外祖服總麻外無二統者君母亾則尋申其外祖小功賈公

彥云君母在既為君母父母其己母之父母或亦兼服之以周案外親無二統鄭注服問亦言之義不尋兼服賈疏非自降外祖總麻亦無見文馬說亦難信徐氏通攷胡氏正義皆沿賈右母黨服

不杖期章姑姊妹女子子適人無主者姑姊妹報傳云為其無祭主故也鄭元云無主後者人之所哀憐賈公彥云無主有二謂喪主祭主傳不言喪主者喪有無後無無主者詳禮記今無主者謂無祭主也適人謂士若嫁亏大夫亏本親又以尊降不尋言報敖繼公云姑姊妹亦以其所加者服之言報者服期之義生亏己而不枉

彼故也郝敬云姑姊妹亏姪昆弟亦無主者亦然夏旣云夫已物又無子則爲無主後無主後則無祭主矣古小宗不立後祭亏宗子之家當室之曰謂之陽厭厭祭者不配是其夫猶尋祔會亏宗子之家而妻不尋與焉故仍服本服之期以致其哀憐之意以周案凡出適人以無主加者惟此至親三族郝說無據

小功章從父姊妹孫適人者賈公彥云從父姊妹不言出適與在室姊妹旣逆降宗族亦逆降之故不辨在室及出嫁敖繼公云從父姊妹孫適人者當連讀三者適人其服同以周案張氏蔡氏程氏胡氏竝從敖說從父

姊妹適人者小功則在室大功故大功從父昆弟鄭注云其姊妹在室亦如之賈與鄭違

小功章大夫之妾爲庶子適人者馬融云適夫人庶子也在室大功出降一等鄭元云君之庶子女子子也庶女子子在室大功其嫁亏大夫亦大功敖繼公云女子子不必言庶文有脫誤以周案石經初刻爲下有君之二字據馬鄭注以有君之二字爲是馬云適夫人以君爲女君此以適士降非出降也鄭云其嫁大夫亦大功破馬氏出降說也賈疏仍沿馬誤云庶子以別己所生也已所生亦大功敖說亦非

右適人服

檀弓齊穀王姬之器魯莊公爲之大功程迥云禮亏舅之妻無服外祖父母纔小功目今以世讐而厚其器非禮也薛季宣云主昏之爲服自莊公始也其以說齊乎以周案程說固非薛氏以此爲主昏服是已而以爲主昏無服亦失之凌曉樓云鄭注春秋周女由魯嫁卒服之如內女服姊妹是也天子爲之燕服嫁亏王者之後乃服之器服君爲姑姊妹女子子嫁亏國君者著大功之服王姬旣比之內女故服大功亏其卒也書之同亏內女此春秋之例也三傳皆然

右主昏者所爲服

不杖期章夫之昆弟之子傳日報之也鄭元云男女皆

是盛世佐云此唯男子也女子子未成人者以殤降成人而未嫁者逆降其旁親旁親亦當逆降之矣以周案盛說是也爲夫之昆弟之婦人子適人者女子子嫁者未嫁者爲世叔母竝見大功章李氏云凡爲夫之黨尊者皆從服卑者皆報之從服故降其夫一等卑者以名服己與夫同故己報之亦與夫同

大功章爲夫之昆弟之婦人子適人者鄭元云婦人子女子子也不言女子子者因出見恩疏陳銓云婦人者夫之昆弟之子婦也子者夫之昆弟之女子子適人者也先儒皆以婦人子爲一人此旣不辭且夫昆弟之子

婦復見何許以周案此爲夫之昆弟之婦人子適人者
與女子子嫁者未嫁者爲世母叔母兩節對文嫁者適
人者爲大夫士異其文其義一也則婦人子猶云未嫁
者不言女子子遠辭也馬注小功章云丈夫婦人者明
疏遠故以遠辭言之鄭注恩疏義卽本馬是也但以婦
人子爲已出義似未當婦人子對適人爲文謂已成婦
道之子傳所謂成人而未嫁者是也女子子成人者有
出道故稱婦人子婦人子逆降旁親則旁親宜逆降之
故其服與適人者同陳氏說誤爲昆弟之子婦宜小功
如服大功反重亏已之庶婦不亦親疏失其差乎

見本條

且子婦何尋偁婦人經亏異姓之來婦者曰婦其偁婦

人者七

經齊衰無受章一大功章二小功章二傳齊衰章亦二

皆指女子子言女

子子爲統辭其對丈夫言曰婦人兼已嫁未嫁爲文此對適人言又曰婦人子專以未嫁言也

小功章夫之姑姊妹娣姒婦報馬融云報者姑報姪婦也李如圭云報指夫之姑姊妹而退在下者要娣姒之服亦因夫而生故使并蒙上文敖繼公云娣姒婦亦言報者明其不以夫喪之尊卑而異也以周案凡經言報皆旁尊報卑之辭故馬注專以姑報姪婦爲言其實敵者兩相爲亦可謂報特不可施卑之亏尊耳傳曰娣姒

婦者弟長也以弟釋娣以長釋姒爾雅長婦謂稱婦爲娣娣婦謂長婦爲姒其弟長專以夫季爲齒不以己季左傳穆姜叔向嫂皆呼夫弟之妻爲姒蓋相推讓之辭賈疏以爲娣姒據婦季大小爲言近儒辨之詳矣

總麻章夫之諸祖父母報鄭元云諸祖父母者夫之所爲小功從祖祖父母外祖父母或曰曾祖父母曾祖弓曾孫之婦無服而云報乎曾祖父母正服小功妻從服總敖繼公云其夫之從祖祖父母及從祖父母與盛世佐云夫之外祖父母妻當從服總而外祖父母爲外孫總則亏其婦無服可知不尋云報然則此經所指者唯

夫之從祖祖父母從祖父母而已以周案經文祖父母三字連讀舊說皆同器服經亏世父母叔父母皆別言之此祖父母中亦有世叔之不同故又云諸以統之舊讀直合曾祖父母言鄭注斥之是也鄭又合外祖父母言盛說斥之亦是也盛從敖說又合從祖父母言則經文諸祖二字連讀而仍兼從祖祖父母則又以祖父母三字連讀是又遷就無據也阮氏校鄭注增從祖父母四字程氏改外祖爲從祖又改注末曾祖爲從祖段氏謂當依今本化從祖祖父母外祖父母而注末曾祖當爲外祖皆未當記曰夫之所爲兄弟服妻降一等外祖

父母小功其妻從夫服總服間有從無服而有服公子之妻爲公子之外兄弟鄭注云爲公子之外祖父母從母總麻是夫之外祖父母固服總也所疑者外孫婦無服不尋云報耳

大功章傳夫之昆弟何以無服也謂弟之妻婦者是嫂亦可謂之母乎鄭元云卑遠之故謂之婦嫂者尊嚴之稱是嫂亦可謂之母乎言不可嫂猶叟也叟老人稱也朱熹云傳意本謂弟妻不尋爲婦兄妻不尋爲母故反言以詰之言其不可爾非謂卑遠弟妻而正謂之婦也注誤以周案今本注文誤脫據通典所引有言不可三

字胡氏云注意言嫂者雖是尊嚴之偶然竟謂之母則不可也不過比之以老人耳 又案敖氏疑傳以男子不服昆弟之妻爲答與夫之昆弟所以無服之義相違沈氏云嫂不可謂母故不尋以服夫之昆弟之子者服其弟弟妻不可謂婦故不尋以服夫之世叔父者服其兄此正答昆弟之妻不服夫之昆弟之義沈說甚驚大功章傳言夫之昆弟無服檀弓亦言嫂叔無服成祭說器服記言夫之所爲兄弟服妻降一等由此言之嫂叔大功萬斯同徐乾學等竝主祭說且謂爲兄弟服鄭氏不能解賈氏不尋已以夫之從母當之非也以周案

鄭不注此者義見上傳非不能解也上傳云何如則可謂之兄弟傳曰小功以下爲兄弟鄭注云兄弟猶言族親爲兄弟服謂功服以下之族親賈疏以夫之從母解此固非從母非族親也成粲改記文兄弟爲昆弟又刪之所二字以爲嫂叔有服之證萬徐從而和之更謬顏師古等議嫂叔服云闔門縞絜己獨元黃葬改實有未安竊攷奔罋云無服而爲位者惟嫂叔又云婦人降而無服者麻鄭注云雖無服猶弔服加麻袒免爲位哭也是嫂叔之罋固弔服加麻矣非己獨元黃葬改也鄭注又云正言嫂叔尊嫂也兄公亏弟之妻則不能也言不

能為位以哭是兄公亏弟妻遠之尤深矣唐代既為嫂
叔制服小功又為其弟妻及夫兄亦小功尤非

右夫黨服

林喬蔭云小記世子不降妻之父母其為妻也與大夫
之適子同則大夫之適子為其妻之父母服可知大夫
之適子服大夫之服則大夫亦不降其妻可知以周案
大夫絕總如林說世子為其妻直與大夫同何必云大
夫之適子

鄭元云有從重而輕為妻之父母妻齊衰而夫從總麻
不降一等言非服塋敖繼公云從期服而總是降三等
矣妻從夫降一等子從母降二等夫從妻降三等塋之

宜也以周案敖說明晰 右妻黨

禮慈母如母三季君子子爲庶母慈已者小功而記曾子問篇言慈母無服練冠以器慈母自魯昭公始鄭元說禮經所云乃大夫以下父所使妾養妾子子游以爲國君亦當然國君之妾子亏禮不服也梁書天監七年詔云禮言慈母有三一則妾子無母使妾之無子者養之命爲子母服以三季二則嫡妻子無母使妾養之但嫡妻之子妾無爲母之義故服以小功三則子非無母擇賤者養之義同師保內則云擇亏諸母與可者使爲子師其次爲慈母其次爲保母言擇諸母是擇人而爲

此三母非擇取兄弟之母也子游所問自是師保之慈
非三季小功之慈也故夫子畧有此荅鄭元不辨三慈
混爲訓釋引彼無服以注慈已後人之謬實此之由經
言君子子傳云賢人之子也總言曰賢無所不包則知
慈加之義通乎大夫以上矣以周案經言慈母三季庶
母慈已小功竝主大夫以下之庶母言大夫以上爲慈
母無服其有非庶母而慈已者僅可比亏總麻章之乳
母大夫以上尤不爲之服內則所言之慈母其擇亏諸
母者爲庶母其擇亏者可與娶通爲女師可俗字別
女傳作阿
亦俗字說鄭引內則反以證此庶母慈已明內則諸母
文娶女師

亦庶母也梁武帝斥鄭誤矣其謂君子言賢無所不包
王子亦服小功五月尤與古違公子爲其母練冠在五
服外尙尋爲庶母慈已者服小功乎

喪服齊衰三季章慈母如母父在爲慈母不見今文家
說慈亏賢妾父在齊衰期慈亏賤妾父在大功九月古
文家說慈母如母主大夫士之妾子言大夫之妾子父
在爲母大功士之妾子爲母期以大夫廢降一等士無
廢降例也父卒皆申譙周云經大夫之妾子父在爲其
母大功不別賢賤爲大夫妾雖有賢者不尋體君何尋
不爲廢降凡此之類今文說不如古也以周案譙說是

小功章君子子為庶母慈已者傳云君子子者賢人之

子也石渠論云戴聖曰此大夫適妻之子養于賢妾也

大夫不服賤妾慈已則總服其不言大夫之子而偁君

子子者君子猶大夫也胡云戴意庶母指賢妾言大夫

慈已加小功若賤妾則大夫不服適子亦不服慈已但加總耳案馬雷說與戴同鄭義不爾馬融云

賢人者適夫人也子以庶母慈養已加一等小功為父

賤妾服總父沒之後賢賤妾皆小功案馬氏據慈已鄭

元云君子子大夫及公子之適妻子云君子子則父在

也父沒則不服之矣以慈已加則君子子亦以士禮為

庶母總也雷次宗云大夫不服凡妾父所不服子亦不

敢服安舁爲庶母總哉大夫惟服姪娣今所服者將姪
娣之庶母敖繼公云云君子子則父在也父在且申此
服則父沒可知矣郝敬云君子謂君與女君子是大夫
公子適妻之子重言子明舁亏士庶人與妾子之爲子
也以周案鄭意大夫之妾歿亏宮中亦爲之三月不舉
祭故大夫之子亦舁以士禮爲庶母總不必贅妾此又
以慈己而加服一等故小功父在小功父沒宜亦同此
而鄭云父沒則不服之者專爲適子言也庶子爲父後
者爲其母總適子爲父後安舁服庶母之慈己者馬說
因非雷敖兩說亦未達鄭意郝說之謬凌曉樓辨之已

詳傳以君子爲賢人

俞云古人稱賢人爲君子女戴云大男女同之詩曰彼君子女

夫適妻馬云適夫人鄭注本戴又兼公子爲說馬意此章君子子爲適子所以別齊衰三季章慈母如母之爲妾子也鄭意傳以君子爲賢人士之適子義不尋稱賢人子內則賢人則爲衣服注云賢人大夫以上故以此爲大夫及公子之適子明不關士此注家依經傳立文義當如此而大夫及公子之庶子自可準此而推故鄭注齊衰三季章慈母如母又云不命爲母子亦服庶母慈己之服其注曾子問子游問慈母云大夫士之子爲庶母慈己者服小功又兼士言皇氏以士字爲誤是也

士有乳母無慈母金氏禮箋胡氏正義乃據鄭之彼注以斥此注謂經此章文通大夫士之適庶不顧經傳君子賁人之文妄翻舊義是亦不恩之甚也 又案注引內則三母以證公子引大夫之子有食母以證大夫末引國君及士無食母以證爲庶母慈己者之君子子爲大夫及公子之適子義不關君與士注意如此但內則之食母卽總麻章之乳母鄭引大夫有食母以證大夫子有慈母已失其義末又以國君及士無食母爲無慈母尤非國君特不爲慈母服耳非無慈母也士雖自養其子或有故而不能自養亦未必無乳母總麻章之乳

母亦士禮此皆鄭注之失也內則三母爲國君養子禮
注已言之而其禮可通亏公子之養適子此注引三母
以證公子之有慈母本無可疑而讀者不審誤以注引
三母爲證大夫之子於是駁者紛起而疏家申鄭乃謂
內則三母義通大夫士此又讀注者之失也 又案總
麻章士爲庶母傳曰以名服也大夫以上爲庶母無服
明孝慈錄適子眾子及子婦皆爲庶母齊衰杖期且爲
上下通制不古

總麻章乳母石渠議云大夫之子有會母大夫降乳母
邪間人通漢曰乳母報義之服始封之君及大夫皆不

降馬融云士爲乳母服敖繼公云此亦蒙上士爲之文
士之妻自養其子若有故或使賤者代會之故謂之乳
母其妾子亦然大夫之子亦有乳母父沒乃爲之服以
周案敖說是

右庶母慈母乳母服

徐堅云儀禮經小戴記繼父服竝有明文斯禮之正說
也馬融王肅賀循等竝僞大儒達禮喪燕異文唯傅元
著書以爲父無可繼之理不當制服袁準作論亦以爲
此亂名之大者竊以爲藐爾窮孤不能自立在生也實
賴其長育及其死也頓同之行路稱情立文豈應如是
咎朋友之歿同襲之器竝制總麻詳諸經典比之亏此

蓋亦何嫌以周案傳之言盡之矣傳兩言無大功之親似各在異國者

喪服傳云夫死妻稱子幼子無大功之親與之適人而所適者亦無大功之親所適者以其貨財爲之築宮廟歲時使之祀焉妻不敢與焉若是則繼父之道也小記曰繼父不同居也者必嘗同居皆無主後同財而祭其祖禰爲同居有主後者爲异居賈公彥云子與母往繼父家三者皆具卽爲同居三者闕一則爲异居孔穎達云繼父有子爲异居此子有子亦爲异居敖繼公云傳以三者具且同居故爲服小記言與此异以周案敖氏

析同居亏三者外故致器服傳與小記不合非也記云
皆無主後卽傳兩無大功之親孔氏謂此子有子亦爲
异居亦非

右繼父服

晉書禮志云摯虞以爲自古無師服之制故仲尼之器
門人心器三季是則懷三季之器而無齊衰之制也以
周案晉人蓋有爲師齊衰者故仲洽云爾

白虎通義云弟子有君臣父子朋友之道故爲之隆服
入則經出則否以周案弟子爲師經而出朋友居則經
出則否檀弓篇箸之矣白虎論無所據禮疏引禮論云
爲師及朋友皆旣葬除之

右師友服

記檀弓有同母異父之昆弟死子游曰其大功乎子夏
曰我未之弔聞也魯人則爲之齊衰廬植云子游爲近
是禮家推之以爲當小功王肅云異父同母昆弟不應
有服此謂與繼父同居爲繼父期故其子大功高堂隆
云外親正服不過總麻若以同居從同爨服云大功過
也馬昭淳弓睿等說此恩繫亏母不亏繼父宜從子游
大功說以周案王肅意母嫁已不從卽不爲此等昆弟
服是也其謂繼父同居期其子大功失之繼父有子卽
爲異居繼父不同居齊衰三月乃爲其子大功非服之
筮高堂說較近正

右同母異父之子應附繼父後

總麻章賢臣賢妾馬融云賢臣天子公諸侯卿大夫室
老賢妾謂姪娣也鄭元云此謂公士大夫之君也殊其
臣妾天子諸侯降其臣妾無服士卑無臣妾又賤不足
殊有子則爲之總無子則已敖繼公云此亦士爲之大
夫以上無總服張爾岐云大夫以上爲庶母無服而服
其賢臣賢妾于義難通此承上士爲庶母之文言士禮
目 欽定義疏云據士昏士器皆有室老據士昏則媵
有娣姪室老爲私臣之賢者娣姪之長爲妾之賢者曲
禮曰士不名家相長妾亦足徵之生不名之死則以總
服之宜也大夫不爲庶母服而乃自服其妾乎

小記士妾有子而爲之總無子則已鄭元云士卑妾無男女則不服不別賢賤孔穎達云大夫賢妾雖無子猶服之士妾賤無子則不服以周案士妾之賢者雖無子亦爲之總此謂妾之賤者巨士爲妾之有子者總故其子尋申期大夫不服其妾故其子厭降而爲大功

不杖期章傳曰妾之事女君與婦之事舅姑等鄭元云女君亏妾無服報之則重降之則嫌雷次宗云今抑妾使同婦尊女君使同姑女君亏妾不尋同姑之降婦不降則宜報然報之則違抑妾之義降之則有舅姑之嫌故無服敖繼公云總麻章見賢妾之服彼主亏士若以

士之妻言之乃爲其無親者。若有親者則宜以出降一等者服之。郝敬云：旣云妾事女君如婦事舅姑，則女君視妾如舅姑，視婦可知。褚寅亮云：妾稱適爲女君，儼有君臣之分矣。若仍以本族娣姪出降一等之服，服之是等夷也。當以康成無服之論爲正。若謂士妾有子則稱賢妾，妻當從服，不知從服降一等仍無服也。以周案鄭注：女君亏妾無服。褚氏申之降之則嫌嫌等舅姑。雷氏申之並是。右臣妾服

受業鎮海梅鼎恩
從子家橋全校

卷服通故四

禮書通故弟九

定海黃以周述

鄭元云髻髮者大并纚而紒免之制未聞舊說以爲如冠狀廣一寸卷服小記曰斬衰髻髮以麻免而以布此用麻布爲之狀如今之著慘頭矣自項中而再交于額上卻繞紒也婦人髻者大并纚而紒也髻之昇于髻髮者既大纚而以髮爲大紒如今婦人露紒其象也其用麻布亦如著慘頭然賈公彥云卷大并纚而紒紒上著髻髮髻與髻髮皆繞紒如著慘頭免制亦然但以布廣一寸爲昇以周案括髮士器禮作髻髮髻括通用字謂

束髮也說文佗髻云絜髮也士冠禮之纚與髻同事士
器禮之髻與髻同文鄭注云髻髮者太弁纚而紒紒說
文佗髻云簪結也廣雅曹注云髻卽籀文髻字玉篇亦
云髻同髻髻同髻鄭意太弁纚束而爲髻謂之髻髮是
也免之制與髻髮異髻髮用麻免用布髻髮以麻束而
爲髻免又以布繞髻外也鄭注云免卻繞紒繞紒卽繞
髻也沈氏云鄭注旣云免之制未聞又云舊說以爲如
冠狀廣一寸蓋不以舊說爲然也又引器服小記以釋
髻髮免此鄭自爲之說也是則鄭意免與慘頭相近與
冠不相似疏家用舊說以申鄭非其意矣髻有麻髻有

布髻奔器云男子束括髮婦人束髻以髻對括髮言則髻髮用麻髻亦麻也小記云男子免而婦人髻以髻對免言則免用布髻亦布也小記又云其義爲男子則免爲婦人則髻明髻免之義祇以別男女則髻髻髮無甚殊也婦人麻髻以當男子之髻髮婦人布髻以當男子之免故鄭注三禮或據髻髮以釋髻或據免以釋髻本兩通也孔疏云婦人將斬衰者亏男子括髮之時則以麻爲髻齊衰者亏男子免時則以布爲髻是也如賈疏說髻髮免髻二物而一製何其不察經注之甚乎士器禮云卒斂主人髻髮袒眾主人免亏房婦人髻亏室鄭

注云髻髮太笄纚而紒免如今之著慘頭自項中而并
交于額上卻繞紒也鄭釋髻髮爲紒免爲繞紒二制自
別紒者髻髮爲髻繞紒者于項中額上又繞麻布是繞
髻外而露之也故繞紒卽露髻露髻卽露髻無異義也
賈氏謂髻髮有繞紒之布則直與免制混而鄭注髻髮
紒免卻繞紒之文無以別矣鄭注又云髻亦太笄纚而
紒此明髻與髻髮同也又云髻之異髻髮者旣太纚而
以髮爲大紒如今婦人露紒象其用麻布亦如著慘頭
然此明髻髮本無繞紒之布而髻之繞紒而露者又異
髻髮而同免制也云亦著慘頭然承上文免如今之著

慘頭言之也賈氏謂髻髮有繞紒之布則直與髻制同而鄭注髻異髻髮之文遂無以解矣後儒如楊復敖繼公說尤悖妄不可通 又案慘頭方言廣雅謂之幪頭幪慘字同問器注謂之貊頭魏蔣濟杜布等謂之帕頭釋名又有綯頭云或謂之陌頭貊帕陌皆音近慘頭本非冠也自舊說如冠狀後竟裁白縑以爲帽曰白帽巾亦曰白帕巾愈失其制

杜佑云免自額而卻交項中并其末覆紒而再綴連之以周案此欲合舊說如冠狀爲卽慘頭之制而稍變焉但小記屢以男子免婦人髻對文髻爲露髻免亦當

露紒杜云并其末覆紒而再綴連之誤矣

司馬光云括髮先用麻繩撮髻又以布爲頭帶齊衰以下皆免裂布或縫絹廣寸以周案後人頭帶仿古之免司馬氏以之說髻麻誤

程大昌說免如字解除吉冠之謂免如免冠之免也免非別有一冠衰經冠裳俱有其制而袒免則元無冠服故經算舁而記汪琬云禮禿者不免爲其無紒可繞故也固器免者以何爲也曰不冠者之所服也旣云所服則必有其服而不止亏不冠矣小記括髮以麻免而以布是免用布也左傳穆姬使以兔服衰經逆則免之有

服審矣以周案汪氏申鄭駁程甚晰問卷云冠者不肉袒何也曰冠至尊也不居肉袒之體也故爲免以代之也免以代冠是免別有其物非卽太冠之謂矣

呂大臨云免以布爲卷幘以約四朶短髮而露其紒冠禮謂之缺項以周案此卽舊如冠狀之說也而又誤以爲缺項

萬斯同云親始死冠太而纚猶存至小斂并纚太之而易以括髮其制必與纚相似蓋纚用緇而括髮用麻布也戴震云始死太冠二日又太并纚亏是不復用吉時之總而以麻代之使髮不至亏蔽而已免則以布束髮

易其麻也鄭君不解麻之所以代總而言夏加麻亏首
失其傳與林喬蔭云小斂太冠總并太笄縱其髮蔽被
亏後因用麻以約其本故謂之髻開元禮有被髮之文
書儀家禮因之迄亏今循而弗改既夕記三曰絞盥上
接脫髦之文下繼冠六外是盥者卽謂髮之被而盥者
也絞之則束以成紒矣紒而謂之絞盥以昇亏常時之
紒也以周案三說皆與鄭昇不足據姑錄之以備考
鄭眾杜預說泉麻與髮相半結之曰髻馬融說髻屈布
爲巾高四寸著亏顙上以周案髻有兩制仲師說有合
亏麻髻之義季長說有合亏布髻之義故康成注禮兩

用其說左傳孔疏存入主出奴之見妄爲申駁非也麻
髻如括髮鄭注云括髮太笄纒而紒紒者以麻結髮爲
髻也但云麻髮相半結之似誤布髻如免鄭注云免用
麻布爲之如今著慘頭然慘頭者用衰巾帕頭與今婦
人頭帶相似

皇侃說婦人之髻有麻有布有露紒其形不同麻髻以
對男子之括髮布髻以對男子之免露紒髻爲恆居之
髻猶男子之不恆免也賈公彥云髻有二種一是未成
服之髻將斬衰者用麻將齊衰者用布二是成服之後
露髻之髻孔穎達說婦人止有二髻一是斬衰麻髻二

是齊衰布髻皆名露紒以周案凡冠與笄對褻冠與惡
笄對褻自小斂至殯髻皆太笄猶男子之不冠也至成
服後男子冠婦人亦加惡笄矣未成服時將斬衰者麻
髻以對男子之髻髮將齊衰者布髻以對男子之免成
服後斬衰箭笄髻齊衰榛笄髻以對男子之褻冠皆以
終褻鄭注士褻禮婦人髻亏室云齊衰以上至笄猶髻
明終褻也男子褻冠以終褻婦人斬衰者箭笄髻齊衰
者榛笄髻以終褻故經曰箭笄髻衰三季皇氏恆居之
髻卽指此但小記云男子冠而婦人笄男子免而婦人
髻冠與笄對不與髻對皇氏以露紒對褻冠斯則非矣

麻髻布髻皆露紒其與恆居之髻異者特無笄耳故鄭注經記竝云髻太笄纒而紒成服後之髻斬衰者箭笄齊衰者榛笄故鄭注器服記云言以髻則髻有著笄者明矣語似兩歧而義各有當賈疏隨文曲解未達鄭意孔疏謂止有二髻不及成服後有笄之髻亦疏略

沈彤云三髻之說發于皇氏頗尋經意至齊衰期成服之髻布總榛笄又自爲一蓋實四髻也程瑤田云太笄之髻猶男子之髻髮免著笄之髻猶男子之冠纓以周案皇氏三髻之說本土器禮婦人髻亏室鄭注注云始成婦人將斬衰者太笄而纒將齊衰者骨笄而纒今言

髮者亦云笄纒而紒此言未成服之髮也又云齊衰以上至笄猶髮此言成服後之髮也下又言髮以髮爲大紒如今婦人露紒其象又言其用麻布亦如著慘頭然此卽皇氏三髮所本也未成服用麻布者所以代總也旣成服不用麻布自用布總矣皇氏所謂恆居之髮卽布總箭笄髮布總榛笄髮有何四髮可分沈說未是笄可對冠髮不對纓程說亦未當

喪服女子子在室爲父布總箭笄髮衰三季鄭元云髮猶男子之括髮斬衰括髮以麻則髮亦用麻皇侃說此經不論男子之括免亦不容說女服未成之髮沈彤云

此經主成服以後言鄭欲以成服之髻等之亏未成服之髻豈不忌髻以麻若布爲其無笄總而代之也旣布總笄以髻矣又安用麻布之慘頭耶以周案未成服之髻以麻若布代笄總旣成服則有笄總可不用麻若布矣而猶謂之髻者仍露紒也皇沈說甚

崔靈恩孔穎達說大功以下無髻沈彤說小斂之節五服親屬皆髻以周案宜從崔孔疏器服經記言髻皆據斬齊而言不及大功小記言男子免而婦人髻亦承上斬齊爲文非統言五服親屬沈氏蓋誤解小記文也孔穎達云大夫與士髻髮亏歿者俱二日故鄭注問器

云二日公笄纓髻髮通明大夫士也自小斂以至大斂
髻髮不改但歿之三日說髻之時四而壞損更正其髻
髮故器大記小斂說髻髻髮是正其故髻髮也非更爲
之其齊衰以下男子亏主人髻髮之時則著免士器禮
小斂主人髻髮眾主人免是也而器服變除不杖齊衰
條襲尸之時云髻髮者誤也以周案小斂髻髮三日說
髻爲上下通制士器禮小斂主人髻髮既殯主人說髻
器大記小斂主人說髻髻髮鄭注以器大記所言是諸
侯禮云士之既殯諸侯之小斂亏歿者俱三日也是髻
髮俱在小斂說髻同在三日之證士先髻髮而說髻在

既殯之後者爲自小斂以至成服髻髮不改不可以說髮也諸侯先說髮而後髻髮亦爲既髻髮不可以說髮也如孔疏說髮在髻髮之間則髻髮中改矣鄭注士喪禮云自小斂以至大斂髻髮不改

陳祥道說小記言齊衰惡筭以終喪則斬衰齊衰之髮皆終喪矣敖繼公說喪服記女子子適人者爲其父母婦爲舅姑惡筭有首以髮卒哭子折筭首以筭布總妾爲女君君之長子惡筭有首布總卒哭子折筭首以筭則不復髮矣妾爲女君君之長子筭總與上同乃別見之者明其不髮也然則三季之喪亦有不髮者矣

欽定義疏云斬衰箭筈髻以終三季經箸之矣其齊衰期者弓卒哭後又有終髻不終髻之異經未之見故記明之記不別言母爲長子則亦髻可知以其爲正體也妾爲君之長子母與女君同不髻者異弓女君也妾之事女君與婦之事舅姑等不髻者異弓子婦也

鄭元云啟殯丈夫髻幘帶屨此互文以相見巨髻婦人之變喪服小記曰男子免而婦人髻男子冠而婦人笄敖繼公云髻者太冠纚而爲露紒也將髻髮者必先髻故言此以明之婦人當髻者自小斂以來至此自若故不必言熊朋來云經有脫字非互文林喬蔭云男子免

冠則露其紒髮者露紒之名不必婦人卷服四制禿者
不髮左傳國人迎卷者皆髮皆非專言婦人也但男子
必免冠而後露紒故經記多言免婦人無冠卽以髮裹
之所以髮可通亏男子免不可通亏婦人以周案對文
男子免婦人髮自是定名械文免亦可稱髮爲髮與免
皆露紒也林說可通但免非太冠之謂也髻髮止亏未
成服以笄啟殯至卒哭唯免而已不髻髮詳見賈疏敖
說非

右髻髮免髮

鄭元云親始死雞斯徒跣雞斯當爲笄纒髻之誤也親
始死去冠二日乃去笄纒髻也陳祥道云雞斯蓋哭

聲鄭改字恐不然以周案大戴器服變除斬衰三季之服有父器笄纓徒跣之文鄭注本之大戴非若陳氏憑空立說廣雅釋詁髻髮髻雞斯髻髻也其說本鄭而失其意鄭注問器破雞斯爲笄纓云二日乃太笄纓括髮明括髮時又太雞斯也士器禮主人髻髮注云始成將斬衰者雞斯今至小斂變髻髮者太笄纓而紒是太雞斯乃爲髻非以髻當雞斯也

戴德說始成妻爲夫妾爲君笄纓不徒跣扱上衽鄭元云婦人將斬衰者太笄而纓崔靈恩說始成斬衰婦人太纓以周案始成婦人太笄而纓猶男子之太冠而纓

也。公纓在小斂日著笄，在成服日宜從鄭說。

鄭元云：始歿，公冠而笄，纓服，浹衣。陳祥道云：檀弓云：始歿，羔裘元冠者，易之始。歿有易冠，無公冠；有易裘，無袒衣。檀弓：叔孫武叔之母歿，既小斂，舉者出戶，出戶袒且投其冠，括髮。謂人子：「子，始器幸生之心，未已，故未忍。」公飾焉。徐乾學云：親始歿，徒跣扱衽，無容哀之至也。豈有下則徒跣而上仍著冠乎？以周案始歿時易服，浹衣其冠履，一時竝。公徐駁陳是。

戴德說：始有父母之器，笄纓，徒跣扱上衽，既襲，三稱服。白布浹衣，繫章甫冠，白麻履。鄭元說：親始歿，公冠笄纓。

如故既襲三稱衣十五升布浹衣扱上衽徒跣交手哭
二日乃去笄纚括髮崔靈恩說親始歿子去冠笄纚如
故徒跣始歿後乃加絜冠亏笄纚之上小斂投冠括髮
斂後大夫絜弁士絜委貌皆加環絰孔穎達說始歿去
冠有笄纚小斂去笄纚著絜冠斂訖投冠括髮絰帶以
至大斂而成服以周案親始歿卽去冠空跣至成服乃
有冠屨故叔孫武叔亏小斂投冠子游譏之也鄭注士
喪禮云大斂不言免括髮者小斂以來自若矣鄭注是
也戴氏變除說既襲後卽冠屨殊誤崔孔合戴鄭兩說
而一之尤悖亏禮冠者服之尊而首之飾也下徒跣而

上著冠服既不稱三日內爲子之痛深無容首亦何忍飾也惟天子諸侯之大斂在三日成服後故器大記云君將大斂子弁經卽位亏序端是也孔疏因謂小斂時子亦弁經殊爲難信

敖繼公云檀弓羔裘元冠者易之易以絜冠淡衣也始殯之服主人以下皆同而未暇有所別異沈彤云叔孫武叔爲其母則非斬衰之主人譙周云父卒爲母始殯元冠尸襲之後因其筭纚而加絜冠蓋斬衰筭纚自始殯及亏小斂之後不改如括髮之自小斂後及亏成服而始改也爲母筭纚尸襲之後而卽加絜冠如括髮

之亏卽堂下位而卽代以免也始歿首服之節笄纓與括髮竝重父母之器皆然但家無二尊故又以時之久暫稍爲差等聖人之尤重父器亏始歿之首服卽見之陳弓檀弓問器不別齊斬失聖人制親器輕重之義敖說與陳殊其誤則一以周案羔裘元冠者易之指始歿言鄭云始歿去冠服淡衣是也自始歿去冠屨後至成服乃著冠屨經小斂但言括髮袒記卒小斂主人袒說髦括髮以麻竝不言去冠是無冠也陳敖說始歿易縗冠小斂又去冠皆非叔孫武叔投冠在尸出戶後本失禮節不足爲典沈說本小記注疏

戴德云小斂之後大夫以上冠絜弁士則絜委貌皆加環經孔穎達云天子諸侯首服絜弁以葛爲環經大夫則絜弁加環經士則絜委貌加環經檀弓云弁經葛而莽注接神不可以純凶天子諸侯變服而莽冠絜弁以葛爲環經是天子諸侯與卿大夫异也以周案大夫士皆三日成服斂時皆免括髮未有用冠弁者天子諸侯大斂在三日成服之後或尋弁經檀弓所言爲莽服何尋據此爲小斂後服

喪服記傳云惡笄者櫛笄也鄭元云櫛笄者以櫛之木爲笄或曰榛笄賈公彥云玉藻櫛用櫛櫛謂用櫛木爲

之故鄭云以櫛之木爲笄敖繼公云此傳之櫛卽檀弓
之榛蓋聲相近而轉爲櫛巨王引之云櫛當讀爲卽卽
柰木也爾雅曰櫛采薪舍人曰櫛名采薪又名卽薪樊
光曰荊州柰木曰采木以周案當從注疏櫛可爲櫛因
謂之櫛猶柰可爲薪因謂之薪也王說孤證難信

記傳云何以言子折笄首而不言婦終之也鄭元云在
夫家宜言婦終之者終子道亏父母之恩敖繼公云卒
哭子折笄首以笄則不復髮矣婦則惡笄以髮白若也
終終器也言婦惡笄以終器無折笄首之事故不言婦
也傳引記文云笄有首則記之惡字似衍以周案終之

也者謂終用惡笄罽服小記云齊衰惡笄帶以終罽謂此女子子在室笄髻三季見罽服經此記補言女子子適人爲父母及婦爲舅姑之服傳又發明婦爲舅姑惡笄以終罽見記折笄首專屬諸子之意鄭注不分子婦之異服失之沈冠雲江震滄竝從敖說

鄭元云始死婦人將斬衰者太笄而纚將齊衰者骨笄而纚敖繼公云曾子問言婦爲舅姑始死之服布浹衣縞總則吉笄而纚自若婦人斬衰而下之服皆當如此沈彤云曾子問言縞總者在塗趨罽之服也若尋常在家而父母始死必太笄總而纚明矣敖不浹考而再易

鄭義何邪以周案沈駁敖申鄭是

右笄纓

器服傳冠纓纓條屬右縫鄭元云屬猶著也通屈一條
繩爲武丞下爲纓著之冠也禮記云器冠條屬以別吉
凶賈公彥說右縫者其冠三辟積向右爲之大功已上
京重右縫小功總麻京輕左縫吉冠纓武昇材凶冠則
纓武同材放繼公云條屬右縫皆謂纓也條屬者以一
條繩爲纓而又屬弓武也右縫者以纓之上端縫綴弓
武之右邊也必右邊者辟經之纓也其屬之內以下端
向上而結弓武之左邊以固其冠也以周案凡冠有笄
者紃燕笄者纓敖說器冠纓制同弓組紃殊謬傳文當

讀冠繩纓條屬句右縫句罽冠無武屈繩纓一條以屬
冠所以代武也舊說亏本文外添說武亦非如鄭解當云繩武纓
條屬如敖解當云繩纓條屬亏武右縫

賈公彥云冠外畢謂兩頭在武下向外出反屈之縫亏
武縫畢向外敖繼公云吉冠亏武上之內縫合之凶冠
亏武上之外縫合之以周案當從疏畢記作繹

記襍記言罽冠右縫左縫之別不明碎積多寡之數賈
公彥云大功已上其冠三碎積鄉右為之小功總麻其
冠亦三碎積鄉左為之朱熹云儀禮三梁冠士禮也今
天子通天冠二十四梁當公其半羣臣如其本品進賢

冠之數呂柟云文皇后之器東宮親王冠九峴皇孫冠七峴則大夫士亦可例降以周案司服云凡凶事服弁服凡弔事弁經服鄭注云服弁器冠也其服斬衰齊衰弁經如輶弁而綦其服錫衰總衰疑衰弁師云王之弁經弁而加環經諸侯及孤卿大夫之弁經各以其等爲之鄭注云弁經之弁其碎積如冕纁之就然一命大夫士不碎積不言服弁服弁自天子以下無飾無等據此而言兩服迥別雖記中斂服弁經葬服弁經皆據本服言然渾言相通析言自別也朱子以弁經制說器冠蓋一時未覈之言明永樂間據而行之呂氏又爲之塗降

殊乖罽服無等之義

右冠

罽服傳莛經大搨鄭元云盈手曰搨搨扼也中人之扼
圍九寸雷次宗說莛經大搨不言寸數各從其人大小
爲搨賈公彥云雷說非鄭義據鄭注不問人之大小皆
以九寸圍之爲正朱熹云首經大一搨只是拇指與弟
二指一圍吳廷萼云以指尺度之一圍不過六寸以周
案說文搨把也把握也搨爲盈手所握朱子說與注義
亦异士罽禮搨化鬲注云鬲搨也史記集解引服虔云
滿手曰搨搨扼義同

記檀弓篇有繆經環經之分鄭元說繆當爲不摻丞之

摻環經弔服之經環經一股大如總之麻經纏而不糾
賈公彥云總之經則兩股此環經則一股纏之不糾以
周案五服之經皆繆經兩股相絞弔服則用環經亦謂
之帶經

詳下卷

以一股麻爲質又別以麻周環纏繞之加

亏絜冠之上與五服之繆經迥然有別故記者有譏亏
子柳也襍記小斂環經公大夫士一也下卽繼以公視
大斂云云是言弔者之服弁經必在主人小斂後雖君
大夫亦然非主人有環經制也鄭意小斂時主人亦一
用環經本失經義崔靈恩孔穎達等遂謂親始死孝子
去冠至小斂士絜委貌大夫絜弁悉畢加亏環經此說

尤謬且弁而加經繆環一也而謂繫弁加亏環經乎曷
崇義五服圖楊信齋經帶圖邱瓊山家禮儀節補以環
經制爲五服之經廖西仲又繫冠亏經上竝沿崔孔之
誤近徐氏通攷變除表苴經環經竝書亦未審也

鄭元說喪服大功布衰裳牡麻經傳云塲之經不繆
蓋未成人也不繆者不絞其帶之也經又言長塲
九月纓經中塲七月不纓經經有纓者爲其重也自大
功以上經有纓以一條繩爲之小功以下經無纓也敖
繼公云繆當作繆檀弓云齊衰而繆經繆絞也經謂首
經也亟者其纓也塲經之有纓者不絞其纓而輒之纓

經謂纓其經也纓卽經之亟者此大功之纓經其亟亏
成人者輒而不絞爾以周案摻當依石經原刻作摻廣
雅摻束也摻絞同義故鄭以絞釋摻褚氏云要經有摻
輒之變若首經九月以上始終有纓七月以下始終無
纓但有有纓無纓之分無摻亟不摻亟之異敖氏以爲
首經誤是也首經有纓以明重非如冠纓以固冠其纓
以一條繩繫經而亟兩頭之餘亏項亦非結亏頤下故
經纓可除冠纓不可除賈氏疏鄭亦失鄭意賈謂纓以固經以結
頤下則小功以下之無纓者其謂之何鄭謂纓以爲重
則非固經之用矣既非固經亦不必結頤下矣今吾俗
經纓向亟項後但用布爲亟爾盛氏說長場除經纓不摻亟中場并除

冠纓尤謬矣

賈公彥云罽服斬衰苴經杖絞帶以一苴目下三事謂以苴麻爲首經要經又以苴竹爲杖以苴麻爲絞帶敖繼公云絞帶用牡麻與菅茅類也以周案當從疏士罽禮婦人之帶牡麻結本主齊衰婦人立文非斬衰男子絞帶用牡麻也

鄭元云士罽禮婦人之帶牡麻結本在房婦人亦有苴經但言帶者記其異此齊衰婦人斬衰婦人亦有苴經也敖繼公說婦人斬衰之帶亦用牡麻房西房以周案經主齊衰婦人言若斬衰亦用苴麻竝當從鄭注敖氏

之說褚氏駁之云婦人重要男子重首豈有婦人經帶反輕亏首服而不用苴之理是也鄭義天子諸侯有左右房士東房西室器大記婦人髮帶麻亏房中爲西房此房中爲東房也敖氏以此房亦西房江氏又駁之云此文承饌亏東方之下且下又有饌亏西坵南之文則此之所饌爲東而非西明矣胡氏又云士之正寢亦有東西房小斂以後男子之位在下階下故陳經帶亏東坵之南婦人之位在下階上故陳經帶亏東房皆就近陳之

戴德說總衰裳牡麻經制同小功馬融破之云經帶從

大功制度小功言澡麻斯言牡麻知從大功也戴德說其屨吉屨無絢敖繼公破之云此承大功之下疑亦用繩屨與齊衰三月同蓋服至尊之屨或當然矣

賈公彥云齊衰期傳帶緣各視其冠帶謂布帶象革帶者緣謂器服之內中衣二者之布并數視其冠本問齊衰之冠因并及帶緣者博陳其義也敖繼公云帶緣各視其冠謂齊衰以至總麻其布帶與其冠衰之緣亦各以其冠布爲之閒傳練冠緇緣檀弓練衣緇緣則重服未練以布與夫輕服之冠衰皆有布緣明矣冠緣者紕也衰緣者其領及袷之純盛世佐云帶緣布帶之緣也

各名齊衰以下也斬衰絞帶無緣齊衰以下以布爲帶
又有緣輕者飾也云帶緣各視其冠則帶之升數各視
其衰與褚寅亮云此衰之緣也至此章傳始言緣則斬
與齊衰三季者無緣明矣胡培翬云此帶之緣各與其
冠布升數同當謂大功以下服輕者若齊衰以上未必
有緣也以周案帶緣當從盛說帶之有緣爲服輕者當
從胡說傳因齊衰之冠并及帶緣疏謂博陳其義是非
齊衰以上有是緣也至衰冠有緣亏古未聞記云公子
爲其母妻麻衣縗緣皆旣薳除之注云此麻衣如漢衣
爲不制衰裳變也是衰裳無緣飾矣敖氏亏斬衰章謂

斬衰領裏亦有純化傳之人未詳要不足據

王肅說絞帶其大如要經雷次宗說絞帶在要經之下
要經又五分去一以爲帶張惠言云生時大帶四寸革
帶二寸則絞帶之大不當如要經可知以周案張申雷

說甚當

林氏求義謂絞帶卽要經亏既夕記小
斂主人絞帶三日絞亟終說不通不錄

李如圭云繩帶者絞麻爲繩化帶也五服之經皆絞麻
兩股相交繩帶則不但兩股矣胡培翬云首經要經皆
用赆麻絞帶當是先以麻糾化繩而後絞之以爲帶說
文段注云兩繩相交而緊謂之絞是也以周案絞經絞
帶皆謂兩股相交兩股交謂之繩故曰絞帶者繩帶也

諸說非闕傳疏云麻帶兩股相合

既夕記三日絞丞舊說此主大功以上男子要經言婦人經帶結本在房初而絞之不待三日敖繼公說大功以上男女竝同婦人之帶雖結本亦未絞至此與丈夫同絞之以周案絞帶全絞爲繩要經弓束身處蓋纏而不糾與環經同

詳下卷帶經

其丞長三尺初祴至時絞之亦

絞其祴者而已故曰絞丞若婦人結本是不丞也既不丞又何絞敖說非

小功布衰裳澡麻帶經鄭元云澡者治去孳垢不絕其本也小記曰下殤小功帶澡麻不絕其本屈而反以報

之賀瑒云下殤小功男子經牡麻而帶澡婦人帶牡麻而經澡故小功殤章云澡麻帶經若依其次不應再帶故知再言男子之帶後言婦人之經也賈公彥云大功以上經帶有本小功以下斷本此殤小功中有下殤小功帶不絕本與大功同故進帶亏經上倒文以見重且上章多以一經包二此別言帶者亦欲見帶不絕本與經不同故也李如圭云賀說非鄭義

記閒傳葛帶三重鄭元云謂男子五分太一而四糾之帶輕既變因爲飾也舊說云三糾之練而帶太一股太一股則小亏小功之經似非也以周案閒傳既虞卒哭

太麻服葛葛帶三重兼要經絞帶言賈疏謂絞帶虞後
變麻服布非也胡竹村云斬衰絞帶既與要經同用苴
麻則虞後亦當與要經同用葛是已 又案五服之帶
甄鸞李淳風算術皆四其實五其法今如其術推之斬
衰之首經據鄭注圍九寸太五分一以為帶四其實_{實九}
寸五其法尋帶圍七寸二分齊衰之經與斬衰之帶同
太五分一以為帶四其實_{實七寸二分}五其法則齊衰
帶圍尋五寸七分六釐大功之經與齊衰之帶同太五
分一以為帶四其實五其法則大功帶圍尋四寸六分
零八豪小功之經與大功之帶同太五分一以為帶四

其實五其法則小功帶圍尋三寸六分八釐六豪四絲
總麻之經與小功之帶同公五分一以爲帶四其實五
其法則總麻帶圍尋二寸九分四釐九豪一絲二忽楊
齋云小功帶三寸五分有奇總麻帶二寸八分有奇未是既虞公麻易葛其帶圍仍
如麻帶以五分公一之四糾之至練又公一股尙尋四
寸五分若依舊說以葛帶三重爲三糾之是五分公二
則虞後帶圍止有五寸四分至練而帶又公一股止尋
二寸七分是并小亏小功之帶圍矣故鄭以爲非說詳下卷
記言婦人不葛帶而麻帶器服大功章男女竝陳有卽
葛九月之文以周案鄭注婦人大功小功者葛帶則不

葛帶者專謂斬衰齊衰也敖氏以爲無葛帶說詳後
右
經帶

喪服記凡衰外削幅裳內削幅幅三衿若齊裳內衰外
賈公彥云自此以下記衰裳之制用布多少尺寸之數
凡者統五服而言以周案此記統言五服衰裳之制故
曰凡則下文所記適負衰衽五服皆然故禮云喪服毋
同鉅細悉記而適負衰衽獨無一言及其等殺黃勉齋
楊信齋據鄭注皆有衰後有負版左右有辟領孝子哀
戚無所不在以爲此唯子爲父母用之旁親不用敖君
善謂服以衰名凡凶服弔服皆有衰矣辟領亦同若負

版則惟孝子有之徐健庵又謂五服皆有衰惟負版辟
領子亏父母用之皆非也如無帑衰後負左右分適則
衰不可著矣帑衰後負左右分適所以固闕中之領也
非虛贅而可去之物也衰之等差在升數不在衰適負
版

負廣出亏適寸鄭元云負在背上者也適辟領也負出
亏辟領外旁一寸賈公彥云負在背上上畔縫著領下
畔叅放之負尺八寸敖繼公云負之廣無定數惟以出
亏適旁一寸爲度其長蓋比亏衰與以周案適博四寸
負縫亏領其廣出亏適寸則尋六寸必出之者爲邊不

緝易轍不出之無以固領也賈疏蓋誤敖說尤非

適博四寸出亏衰鄭元云辟領廣四寸則與闕中八寸也兩之爲尺六寸敖繼公云云博四寸又云出亏衰則出亏衰者非謂其博也則博者其從之廣與凡爲衣必先開其當項之處其上下之度相去四寸左右之度則隨其人之肥瘠而爲之闊狹不定也以周案注適謂之辟領蓋古語也凡衣當頸之處開辟方領其闕中之廣四寸正與衰等又反摺而出之左右則其廣八寸而出亏衰矣必出之者所以固領也不言縱者隨人之大小肥瘠取足爲限也今以廣縱各四寸計之則辟領之圍

尋尺六寸當今布尺爲尺二寸許甚合據鄭注辟領別用布加其上非反摺而出之闕中者衣之開領處也辟領者別用布著疊之以固其領也莊子庚桑楚形之與形亦辟矣崔注相著也絜罔調經論聶辟氣不足王注謂辟疊也是其義辟領周疊領口實尋八寸爲與適博四寸不合故別闕中言之讀者不察謬謂兩相開領之處各尋四寸則領之圍三尺二寸卽肥大人亦不可著矣所以來楊信齋塞闕中以爲領之說也闕中今作闊中蓋誤敖氏以博四寸爲從之廣未是其說隨人肥瘠而爲之不爲無見

衰長六寸博四寸鄭元云廣衰當心賈公彥云綴亏外

衿之上故尋廣長當心以周案衣有內外衿所謂衽也

衰綴亏外衿之上當領處闕中博四寸故衰亦四寸衰

所以承領亦以固之也賈疏申鄭既以衽為掩裳際之

物則此云外衿似亏經外添說後儒以衰衣為對衿之

衣亏四寸之衰又不能當心邱瓊山將對衿之衣斜掩

亏脅以化內外衿尤謬

夏弢甫謂衰著亏適適謂領偏向旁開與衣殊材衣訖乃著適

而衰正當心更屬杜撰張

泉文謂衰左縫右紐亦非

衣帶下尺鄭元云嬰也廣尺足以掩裳上際賈公彥云

帶謂帶衣之帶非大帶革帶也下尺者上下闊一尺其

橫不著尺寸者人有麤細取足爲限也敖繼公云此接衣之布帶謂嬰經黃潤玉云此言人隨身長短亏束帶下再長一尺可掩裳際非別以布接衣也以周案賈疏帶謂衣帶之帶者衣自有帶所以結其衣者也或以爲大帶經帶皆非帶下別綴布一尺以掩裳際與宋人所說襴衫相似但古衣裳殊以橫襴之布掩其際宋人襴衫無裳直以橫襴分上下爾家南山先生說別備一通又案宋人襴衫始亏馬周新唐書車服志云馬周以三代有淡衣請加襴褕標襦爲士人上服

衽二尺有五寸鄭元云衽所以掩裳際也上正一尺莢

尾一尺五寸凡用布三尺五寸

上正一尺五寸據一衽言凡用布三

尺五寸據衽言今本賈公彥云用布三尺五寸尋兩

衽燕尾二尺五寸誤

條衽綴衣兩旁亟之向下掩裳際黃潤玉云此言用布一幅長二尺五寸斜尖裁為燕尾狀施弓領下作內外衽陝頭向上廣頭向下上以承領下與衣齊蓋衣必有衽而後可掩胸體若如鄭賈之說是衣皆無衽如對衽比甲之制失其義矣王庭相云問器曰親始歿扱上衽謂袒衣也若衽衣之兩旁安謂之上大記曰小斂大斂祭服不倒皆左衽謂左掩其衽也若衽裳之兩旁謂之左衽何居說文曰衽衽交也若衽裳之兩旁安有交義

黃說是也以周案方言說文衽字本有兩義此當用衾衿之說爲吾家南山先生之特識衽用二尺五寸之布分作兩衿衰必有衿而後可以廣長當心不然則衰偏矣裳亦必有衣衿而後婦人可以不殊裳不然則毒裳之中幅裂矣觀鄭賈說四寸之衰亦非謂衰衣無衿鄭特略之賈固明言之矣

又案禮服對衿見阮氏三禮圖朱子因以直領對衿爲古服方

領有衽爲胡服說詳衣服門

袂屬幅衣二尺有二寸鄭元云連幅謂不削二尺有二寸謂袂中也言衣者明與身參齊衣自領至腰二尺二寸倍之四尺四寸加闕中八寸而又倍之凡衣用布一

丈四寸賈公彥云闕中謂闕中央安項處四寸當纔
兩相總闕各八寸若甬後據長而言則一相各長八寸
通甬後兩身四尺四寸總五尺二寸也要以一相五尺
二寸并計之用布一丈四寸此惟計身不計袂與袷及
負衽之等者彼尺寸自見又不全幅故皆不言也楊復
說鄭注加辟領八寸而又倍之者宋本注疏作闕中今本誤作闕中楊氏所引作辟領又一本謂別用布一尺六寸橫闕八寸又縱摺而中
分之其下一半裁斷左右兩端各四寸除去不用祇畱
中闊八寸以加後之闕中元裁辟領各四寸處而塞其
缺此所謂加辟領八寸也其甬一半全一尺六寸不裁

以布之中闊從項上分左右對摺向背垂下以加于背之闊中與元裁斷處相接以爲領此又倍之而爲一尺六寸焉張惠言云衣之長二尺二寸而用布尋背後通爲五尺二寸是古衣當肩爲殺縫中屈其八寸爲曲袷袷之左右皆殺去八寸之布而爲縫如是則袷方而衣身止二尺二寸也以周案上文負適衰衽皆削幅不全故亏此別言屬幅袷布屬幅欲與衣身之二尺二寸齊也鄭注闕中之說據賈疏張說卽以衣之本身爲之然當肩殺而爲縫殊屬可疑據楊信齋說別用布加之以塞闕中然鄭注加闕中八寸空句絕上倍之據一相言

而又倍之據兩相言賈疏本明楊氏以而又倍之專屬
闕中亦巧而鑿

袷尺二寸鄭元云袷頸口也尺二寸足以容中人之併
兩手賈公彥云此據複攝而言圍之則二尺四寸與淡
衣同杜佑云繼袷之末又綴以廣尺二寸之布謂之袷
李如圭云袷中二尺二寸自掖下微圍裁之至袷口而
陝止闊尺二寸淡衣曰袷圍以應規是也萬斯同云袷
尺二寸者謂二尺二寸之袷縫其下一尺又畱上一尺
二寸不縫故謂之袖口以周案上云袷屬幅注謂不削
連幅不削欲其袷縱橫正方故襍記謂之端袷李說如

漢衣袂圓殺裁之非襍記凡弁經其衰侈袂謂弔服詳後杜說更誤萬說近是

鄭元說婦人不殊裳衰如男子衰下如漢衣則無帶下又無衽郝敬云鄭注無據婦亦殊裳以周案鄭意經云男子五服竝舉衰裳亏妻妾女子別言總弁髻衰之制獨不舉裳周禮王后六服亦但言衣故云爾陳氏鉉謂婦人衰而不裳尤謬

記檀弓衰與其不當物也甯無衰鄭元云謂精粗廣狹不應法制以周案檀弓篇縣子曰給衰總裳非古也鄭注非時尚輕涼慢禮是衰之不當物也久矣古者縣衰

冠之式亏路門縣器首服之濶亏宮門而禁其不中濶者今庶民不見衰冠之式而講禮之家欲爲衰者又苦無其物爲之慨然愍古焉

右衰裳

器服冠受升數自齊衰四升以下不見亏經鄭學者說齊衰降服衰四等冠七升受衰七升冠八升正服衰五升冠八升受衰八升冠九升義服衰六升冠九升受衰九升冠十升大功降服衰七升冠十升受衰十升冠十一升正服衰八升冠十升受衰十升冠十一升義服九升冠十一升受衰十一升冠十二升小功以下無受冠衰同升斬衰三升三升有半受以齊衰之下等齊衰四

升五升六升受以大功上中下三等之壘大功七升燕
受八升九升受以小功上中二等之壘自大功降服以
上之冠太褻常三等受冠太褻常一等大功正服義服
之冠太褻二等受冠太褻亦一等陳祥道說器服斬褻
二等其冠同六升以其冠爲受受冠七升則始器褻昇
而冠同及受則冠褻皆同由是推之齊褻四升冠七升
受冠八升則四升五升六升之褻其冠同七升受則褻
同七升冠同八升矣大功八升若九升小功十升若十
一升蓋大功用小功之褻爲冠則大功七升八升九升
而冠同十升受褻同十升而冠同十一升也盛世佐說

斬衰二等而其冠同六升受以齊衰之下也齊衰四升五升六升而其冠同七升受以大功之上也大功七升八升九升而其冠同十一升受以小功之中也小功十一升十一升十二升而其冠同十五升抽其半以總麻無上中下之別但有一衰故也小功無受總麻冠衰同者以罷冠之升數窮于此不可以吉冠受之也以周案罷服傳曰齊衰大功冠其受也總麻小功冠其衰也據此大功以上以其受爲冠則同等之冠衰升數有异也小功以下以其衰爲冠則同等之冠升衰升無异而异等之衰升不同冠升可知矣知此則大功以上同服异等

之冠升必有不同亦可知矣自陳氏泥亏斬衰同冠六升之例則同服同冠不如衰升之有別亦未見其果是也且經大功布衰三月受以小功衰傳曰大功布九升小功布十一升鄭解記大功八升若九升小功十升若十一升正據此傳爲說義本明確陳說大功受衰同十升顯與傳悖盛氏沿陳亏傳文大功冠其受小功冠其衰兩其字有异指亦屬牽強凡疑義無確證者不如從舊爲安

喪服記衰三升三升有半其冠六升以其冠爲受受冠七升齊衰四升其冠七升以其冠爲受受冠八升總衰

四升有半其冠八升大功八升若九升小功十升若十一升閒傳云斬衰少三升有半一等齊衰多五升六升二等大功多七升一等小功多十二升一等鄭元說喪服主亏受閒傳是極列衣服之盛盛世佐說喪服文不具目注云主亏受服似泥總衰亦無受服何以特言之耶

喪服記衰三升三升有半鄭元云齊晏桓子卒晏嬰麤衰斬其縷在齊斬之閒謂縷如三升半而三升不緝也斬衰以三升爲正微細勇則屬亏麤也賈公彥云諸侯爲天子臣爲君之等爲義服三升有半金楊云傳云斬

衰菅屨下但言衰三升足明君父至尊衰同升數則三升有半爲布帶繩屨者言也江筠云三升有半之服專以公士大夫之臣言蓋其衰之升數爲三升有半以異于三升之凡爲君者正別嫌明微之意又經不綴于臣爲君之後而獨箸之末條則等殺亦從可知矣以周案金江說亦備一義夏曄甫作五服釋例謂斬衰無三升半之服鄭注襍記本屬縣揣後答張融乃以爲亂世尙輕涼非王者達禮是鄭亦知其說之必不可通也三升有半僅罽服記一見不足據茲說大謬張融語見襍記疏誤以爲鄭荅尤無論世之學融語本檀弓給衰總裳

注意與鄭亦異

喪服記齊衰四升其冠七升鄭元云此謂爲母服也賈公彥云此據父卒爲母齊衰三季而言降服四升父在爲母期正服五升敖繼公說此齊衰四升其亏三季者爲正服亏期者爲降服也齊衰三季有正有義齊衰期者有降有正有義以周案爲母之服皆四升賈疏非總麻十五升抽其半鄭元云總精粗與朝服同去其半則六百縷而疏也敖繼公說總麻七升有半比亏他服之布爲稍疏比亏他布之縷爲畝細細者所以見其爲輕器疏者所以明其非吉布若布縷之或治或否其意

亦猶是也姜兆錫盛世佐說十五升公其半者謂十四升有半而縷計一千一百有六十也下記云三升有半四升有半半者皆謂半升也金榜說總衰錫衰皆用十五升治其縷者唯七升半傳曰總者十五升抽其半有事其縷則其半為無事可知錫者十五升抽其半無事其縷則其半為有事可知以周案總衰為服之窮本弔服也故總衰之制與總衰同皆細其縷而少其升總衰半在大功九升之下總麻七升半在小功十二升之下其例正同襍記云朝服十五升公其半而總則縷之細與升之數皆見故不直云七升半也鄭意如此姜氏以五服等殺推之為十四升有半

如其說則弔服錫衰總衰疑衰皆當爲十四升有半先鄭疑衰十四升之說亦爲非矣

胡培翬云五服用布升數詳亏禮記罔傳而略具亏此記斬衰二等齊衰大功小功各三等而以降正義之服分屬之則傳記無文自鄭此注始賈氏因亏疏內極論降正義服其說多遺漏牴牾難以徵信嗣後宋勉齋黃氏榦有服例信齋楊氏復有圖皆以分別三者之服而亦互有同异良由傳記但言降服未有正義之名難亏訂證也近盛氏世佐謨儀禮集編更定服圖江氏筠謨讀儀禮私記箸降正義服考定其說俱有合有不合以

周案五服冠衰升數及降正義服以胡氏所攷爲最精
案詳見後表 右升數

受業江陰章元治
從子 炳煥 全校

喪服通故五

禮書通故弟九

定海黃以周述

白虎通義云禮曰天子七日公諸侯五日卿大夫三日而成服舊說成服必在殯後一說成服必在三日甫猶望其生也三日而不生亦不生矣故可成服以周案成服必在三日是矣但謂望其生故不成服亦未是士丐二日大斂遂殯已不望其生矣尙不可以成服乎何又延至三日也禮曰三日不怠蓋此時爲子之痛深無容除冠徒跣不忍成服問喪云冠者不肉袒冠至尊也鄭注身無飾者不敢冠不敢冠斯不成服矣士喪禮云三

日成服杖此禮自天子諸侯下達士殯後成服天子諸侯不待殯而成服者是猶士卒哭受服天子諸侯亦不

待卒哭而受服也

天子七月而葬九虞訖而受服九月而卒哭諸侯五月而葬七虞訖而受服

天子諸侯既虞卒哭乃服

既虞卒哭乃服受服未是

器大記云君之器

三日子夫人杖杖則成服可知檀弓云天子崩三日祝

先服五日官長服亏禮近臣君服斯服祝即近臣也三

日近臣服則君之成服可知白虎通義所引禮無見文

蓋當時禮說無據

右成服

記器大記君將大斂子弁絰鄭元云子弁絰者未成服

弁如覆弁而紒大夫之器子亦弁絰以周案弁即服弁

之弁謂麻弁也王肅注襍記云大夫以上在罌斂時弁
經士冠絜委貌弁經謂麻弁絜委貌卽罌冠士小斂後
加經帶至三日成服始加冠衰天子諸侯亏三日後亦
易服弁服故云將大斂子弁經君出疆殯其子不忍成
服而亏大斂時亦已麻弁經疏衰菲杖矣見曾子問疏衰卽齊衰
以是推之則君將大斂其子成服可知也唯成服而後
服服弁云弁經則成服亦可知也大夫之子與士同大
斂未成服不曷有弁

記檀弓弁經葛而葬與神交之道有敬心焉鄭元云接
神之道不可以純凶天子諸侯變服而葬冠絜弁以葛

爲環經旣虞卒哭乃服受服也孔穎達云三月踰時哀
衰而敬生敬則服有飾大夫士三月而葬未踰時不變
服陸佃說葛在弁經下則葛帶也經仍用麻弁經葛而
葬卿大夫以下禮知然者以下周人弁而葬殷人冏而
葬其敬益隆一說自天子下至士皆弁經葛而葬以周
案弁經卽曾子問所謂麻弁經指罍冠說弁經葛者所
以別罍冠之苴經也葬時罍冠本苴經故特言葛以明
之經記言士大夫之葬從柩下窆贈幣主人皆袒免無
用弁時時經苴經亦無用葛者故鄭以此主天子諸侯

言江熙說同是

凡未葬不變服故小記云久而不葬者唯主器者不除其餘以麻終月數者除器則已蕭望之說主器者獨謂子過期不葬子義不可除盧植說其下子孫皆不除以主器爲正耳鄭元說其餘謂旁親也王肅說斬衰之器未葬不變服劉世明說其餘注謂旁親不指言眾子當除也眾子雖不承適非旁親也劉昭說受弔之禮惟器主稽顙餘人哭踊而已諸言器主唯謂一人不指眾子徐邈說妻器無子爲主夫不應除服卽亏下流多不能備禮今且宜變至葬反服亦可夏侯盛雷次宗說不言三季而云主器是不必唯施子孫也吉凶異道不尋相

千殯柩尙在豈可弁冕臨尊夫主妻器爲不宐除庾蔚
之說君所主夫人妻太子適婦此以尊主卑不尋同以
卑主尊無緣以卑之未葬而使尊者長服衰經也且冉
儒說主器不除無爲下流之義唯亏承重之身爲其祖
曾若子之爲父臣之爲君妻之爲夫不待言而明矣以
周案蕭氏獨謂子一說盧鄭兩家兼子孫言一說劉世
明申盧鄭劉昭駁之專主適承重一人又一說王肅謂
有斬衰服者不變庾蔚之從之又一說徐邈雷次宗謂
尊主卑器亦不除已爲庾氏所駁又一說其實主器原
止一人但主器不除凡主人之有三季服者俱不除矣

盧說本明但不必兼孫言之劉雷兩駁皆泥其餘謂期
以下眾主人也凡未殯有主人括髮眾主人免之別久
而不葬則又有主人不除眾主人終月數除之之分諸
說各異王庾近之

右葬服

記聞傳既虞卒哭去麻服葛葛帶三重

鄭注見上卷

孔穎達

云以經五分去一唯有四分作四股糾之積而相重四
股則三重未受服之時麻帶為兩股相合也直云葛帶
三重則首經雖葛猶兩股糾之以周案云去麻服葛葛
帶三重明未受服之麻帶為兩股相糾孔疏是也

胡氏儀禮

正義以麻帶亦四股相糾不足據說詳前

但麻帶既兩股則葛帶三重當如

注所引舊說爲三股相重不必如鄭所言蓋五服之麻帶各去其五分經之一分作兩股交而絞之故謂之絞帶葛帶亦各去其五分經之一分作三股重而糾之故謂之三重則斬衰之葛帶未嘗小亏小功之經也練之葛帶亦三重注駁舊說云練而帶去一股恐未必然蓋亦去其五分經之一三重糾之鄭以卒哭三重爲有飾練帶不尋無飾作兩股明矣

鄭元云卒哭婦人說首經不說帶齊斬婦人帶不變也婦人少變而重帶帶下體之上也大功小功者葛帶時亦不說者未可以輕文變亏主婦之質至耐葛帶以卽

位敖繼公云婦人重帶有除無變其三平者至小祥除之齊衰期以至小功皆終器而除之其總麻者此時亦不說既退則除之與以周案賈孔申鄭以器服大功小功兩章有卽葛之文章內皆男女竝陳是大功小功婦人有葛帶之證然少儀云葛經而麻帶檀弓云婦人不葛帶而麻帶竝未分齊斬與功服之異器服雖有卽葛之文亦未明云婦人有葛帶敖氏此說不爲無見

士虞禮虞主人及兄弟如葬服鄭元云葬服者旣夕曰丈夫髻蔽帶亟也賈公彥云小斂時斬衰男子括髮齊衰以下免啟殯之後雖斬衰亦免而無括髮敖繼公說

葬虞之服主人括髮眾主人免大功以上皆蔽帶絜以
周案母絜唯小斂一括髮餘皆以免終事父絜自小斂
至成服常括髮自成服至卒哭亦受之以免矣卒哭後不免
小記云既葬而不報虞則雖主人皆冠及虞則皆免鄭
注皆免自主人至總麻則主人亏虞亦免矣小記又云
君弔雖不當免時也主人必免不蔽麻鄭注不蔽麻者
自若絞絜為人君變貶亏既啟之後鄭直以不蔽絜為
貶亏啟殯則著免不貶矣是主人亏葬亦免也敖說燕
據

魏休甯說禮大功之衰易斬衰既練之服是中祥宜緇

其衰也若不緇爲重大功不昇奪之又三季之器筭杖
不易其餘皆變中祥緇衰是輕之也不緇則無變魏顓
難之云若如斯言斬衰但止三月殆非立禮之意大器
初衰三升既虞六升中祥七升衰以三變非不降也何
必期于緇衰然後爲殺禮女子子適人有父母之器既
成齊衰之服而夫出之不改服而待既虞更服斬衰之
服終三季以此徵之不緇衰亦可知也緇與不緇別齊
斬爾今斬止一期稱爲三季何見魏休甯解之云爲父
既虞受六升之布齊衰既虞以七升布爲衰禮女子子
出待既虞受以斬衰之受非更斬也父母情等服俱三

季父斬衰母緇衰以別尊卑斬止三月未爲怪也魏顓
難之云如偃緇之斬名何尋復存孔汪問徐邈云終喪
服斬釋斬偃緇非漸殺意邈荅云凡喪服襍變備載經
記而變斬以緇經都無證且禮稱斬衰三季此不易之
文也以周案邈顓說是

右變服

舊說三季之喪期而練謂著練冠練中衣也其受衰七
升名曰功衰與大功布同也張載說練衣謂鍛煉大功
之布以爲衰故言功衰功衰上之衣也以受始喪斬疏
之衰呂大臨云功衰是卒哭所受六升之服六升成布
曰功衰

林氏來義申
呂詳不復錄

黃榦云練再受服經傳雖無明文

謂既練而服功衰則記禮者屢言之襍記云三季之器雖功衰不弔練則弔又云有父母之器尙功衰而耐兄弟之場則練冠以耐服問云三季之器既練矣有期之器既葬矣則帶其故葛帶經期之經服其功衰以周家勉齋引記三節以駁張子說可謂當矣然注疏據斬衰之受服功衰在練遂概以功衰爲練服呂氏又不計斬齊之受功衰有遲早遂概以功衰爲卒哭之受服實皆失之一偏禮多以功沾對文沾謂麤惡經云斬齊衰曰疏衰裳不言布大功謂之大功布明斬齊之疏衰猶未成布也六升成布記有其文然六升之布尙不尋稱功

布功布自在七升以上故大功猶稱沾功謂功布之加
麗功者也則六升布無功名明矣以斬衰正服三升言
其卒哭受服六升不稱稱功以齊衰言三季服衰四升
受服七升杖期正服五升受服八升義服正服六升受
服九升正合大功三等之布此受衰所以有功衰之名
也襍記首言期之器十一月而練十三月而祥十五月
而禫據母器杖期而言下卽繼以三季之器亦據母服
爲文母器之三季者其受服功衰也卒哭受服服功衰
不以弔如有有服之親器亦服其功衰之服而往哭之
有服卽下大功之屬所謂有殯間遠兄弟之器雖總必

往非兄弟雖鄰不往是也練則弔以下數句又申言杖期弔哭之禮大功弔哭而還不聽事與上文有服往哭之義同皆以既葬爲斷凡弔者宜聽事故公弔其臣亦曰寡君承事大功者其有服之親也弔哭而還不聽事明往哭雖兼行弔而仍有異亏常弔此母喪弔哭之禮異亏期功者也鄭注以功衰爲既練之服嫌與練則弔相觸遂改易經文恐未然也禭記又言有父母之喪尙功衰而祔兄弟之塋則練冠祔謂祔兄弟之塋而尋練冠者惟父喪既練母喪既葬之後其受服功衰乃尋爾也服罔帶其故葛帶經期之經服其功衰帶曰故經曰

期別其事而三季既練與期既葬其受服皆功衰故變
文言其曰服其功衰明兩服同也舊解俱不明析

禮器服記公子爲其母練冠麻衣縗緣爲其妻縗冠麻
衣縗緣賈公彥說縗冠縗布爲之縗緣以縗敖繼公說
縗冠之縗亦當作練冠衣皆有緣以周案練冠縗冠有
別練冠但凍其布縗冠則又染之以采縗淺絳也練者
凍其布也縗緣亦以布緣其衣敖氏以爲緣冠亦誤褚
氏從敖未是

舊說云小祥之練用練布爲衣冠夏斚說小祥之練冠
爲縗其練衣用布說文練凍縗也器冠用布小祥之後

以練易布不染大祥易練以縞縞繒之精焉者也至禫
易縞以纖周傳注黑經白緯曰纖始半元冠之吉矣以
周案周傳期而小祥練冠縗緣又期而大祥縗縞麻衣
麻衣者十五升白布深衣也大祥乃易白布深衣則小
祥後其外衰猶未除也故鄭以小祥之練衣爲練中衣
至大祥乃玄衰縗縞絲練冠練衣皆布夏氏以練冠爲
縞本方懋說練衣布練冠縞一練二物與賈疏縗冠縗
緣一縗二物同失

記襍記既祥雖不當縞者必縞然後反服鄭元云有以
器事贈賄來者雖不及時猶變服服祥祭之服以受之

重其禮也陸佃說此言親器雖既祥猶有他器未除今以祥故無所不用編編既祥之服也然後反服反他器之服萬斯同說大祥之時止妻妾子女有服其他期服以下之親皆除諸人既來與祭亦必易之以編冠事訖然後反吉服以周案大祥主人朝服編冠其與祭者亦吉服編冠也記云編冠元武子姓之冠謂此鄭注似本文外添說陸氏較順當以萬說爲正

鄭元云朝服始卽吉正祭服也小記除成器者其祭也朝服編冠是也祭猶編冠未純吉也既祭乃服大祥絜編麻衣釋禫之禮云元冠黃裳則是禫祭元冠矣黃裳

者未大吉也

釋禋禮卽變除禮

既祭乃服禋服朝服綬冠踰月

吉祭乃元冠朝服既祭元端而居復平常也柴紹炳說
檀弓祥而縞是月禋謂大祥之後則服禋服禋服者縞
縞麻衣是也禋祭者服終而釋吉卜日以祭閔傳云禋
而纖無所不佩纖者吉服正與魯論玄纁無所不佩之
義同蓋既祭而釋吉故禋服曰是月禋祭曰中月小祥
卽易練服大祥卽易禋服禋祭卽易吉服以周案祥祭
朝服縞冠見小記襍記既祥縞麻衣見閔傳麻衣者
白布淡衣也見襍記鄭注禋非吉祭禋祭服元端纁服
小記除殤之纁者其祭也必元注云不縞冠元端黃裳

而祭不朝服未純吉也。亏成人爲釋禪之服則此云元冠黃裳爲元端服矣。旣禪而織戴君變除禮云黑經白緯曰織是也。祥縞禪織吉。元夏書曰元織縞鄭注引舊說織冠者采纓也。織或作綬旣禪綬冠亦謂縞冠有采纓爾。鄭義如此。但大祥旣用朝服元衣絜裳而禪祭轉用元端元衣黃裳未大吉之服似失其次。其意祥祭易朝服之冠禪祭易朝服之裳其實經凡言朝服可易其冠而不可易其裳。元衣黃裳卽元端服何朝服之有。今以記文考之祥祭縞冠朝服禪祭元冠朝服吉祭大夫仍元冠朝服孤卿則用黻弁服釋禪之禮不足據也。右

練祥禫服

凡重器未葬虞不變服若有輕器又遭重器者則服其

重服既虞乃行輕器練祥之事

禮記

其有父母同月日器

者則葬先輕而後重虞先重而後輕故先葬者不遽虞

其葬服皆斬衰虞祔祥練則服其服卒事反服父服子

問小記

及鄭注有三季之器既虞又遭期器則男子經其上服

之葛經帶其下服之麻帶

是謂重者特輕者包見

既葬

而上服猶未練則男子又帶上服之葛帶

凡下服虞卒

哭男子反其故葛帶婦人反其故葛經其上服

大功之

除則固自受以下服之受矣又見哭射慈說

亏期器亦如之齊大傳并注若小功總麻無所變亏斬有

三季之器既練又遭期器則經帶皆麻

是謂重麻見服問注既葬

則男子帶其上服之葛帶經下服之葛經

是謂重葛見問傳并注時

婦人亦重麻重葛

有大功之器亦如之

服問

男子重首重者特故

首經未除無變既除乃加男子輕喪輕者包故喪帶隨

時可易亦必麻葛大小相同斯可兼服兼服有數說鄭

注小記云兼服之謂服麻又服葛也男子則經上服之

葛帶下服之麻婦人則經下服之麻固自帶其故帶也

兼服之文主亏男子一說重特輕包即為兼服兩器不

必麻葛兩兼兼服之文統男女兩說皆通當以鄭義為

正鄭意以問傳輕包重特對文麻葛重麻葛兼服亦對

文故云爾也又一說男子輕喪輕者包故喪服斬衰之帶又兼服齊衰之帶也此爲不經之談又通典載杜預束皙傳純荀訥易服之議亦多違經典

記服問三季之器既練矣有期之器既葬矣則帶其故葛帶經期之經服其功衰有大功之器亦如之皇侃孔穎達說此大功之器專承上三季之器練後言也亦如之亦上既葬矣帶其故葛帶經期之經也此期經爲大功經崔靈恩說此統承甫三季既練期器既葬又合大功既葬故帶其練之故帶經期之經張載說斬衰既練齊衰既卒哭則首帶皆葛又有大功新器之麻則與齊

之首經麻葛兩施之若大功既葬則當服齊衰之葛不
服大功若齊衰未葛則大功之麻亦止當免則經之而
已以周案凡變服必因其受服之節故爲輕器易服惟
在葬祔祥禫他時不變也此文以崔說爲順若在大功
未葬以苴則經期之葛經帶大功之麻帶也以三季之
器既練遭大功之器重麻例之自見橫渠張子申崔說
不敢易斬衰之帶遂謂一首可施兩經不經之言

舊說服間有大功之器亦如之謂三季之器既練而有
大功之器既葬則帶其故葛帶經大功之經以其經帶
既同四寸有餘又宜進爲期之經也期經五寸餘以周

案兼服必麻葛相同其經帶亦五分太一此通例也金輔
之駁若非既練除首經而有後器重麻重葛不拘此例如
三季既練而有大功既葬其經帶俱四寸餘矣

記服問殤長中變三季之葛鄭元云此大功之親為殤

在總小功者也庾蔚之說服問云麻之有本者大功變

三季之葛既練遇麻斷本者亏免經之次云小功不易

器之練冠固說麻之有本乃能變正服之葛又云殤長

中變三季之葛是論期殤之大功如鄭說為大功親之

殤者如總小功之經麻既斷本又與三季之葛大小絕

殊安尋相變邪以周案庾說非襍箸有說

記襍記如三季之器則既穎其練祥皆行鄭元云穎艸
名無葛之鄉太麻則用穎孔穎達云既穎謂後器既虞
卒哭合變麻爲葛無葛則用穎也陸佃云凡器服皆麻
練而葛禪而後穎穎吉服以被穎黼衣錦尙絢知之吳
澄云古字聲同多借故絺麻之絺與單縠之縠並通作
穎鄭氏以穎爲代葛之絺是也陸氏以爲單縠之縠不
愬詩之縠衣禮之穎黼皆婦人上服以禦塵豈可指爲
男子之吉服哉若欲言禪後吉服何不言元端而言穎
乎以周案詩之縠衣禮之穎黼皆以絺爲之渾言之皆
通析言之名其物謂之絺治其縷謂之穎織以爲衣謂

之緊繫禪衣故玉藻曰禪爲紉此旣穎自當從鄭爲正
林氏求義謂穎卽大祥後之麻衣練祥吉禮必器服旣
除之後乃可舉行引呂與叔祭而誠至則忌哀祭而不
誠不如不祭之說不知致誠愈哀致哀愈誠祭義曰祭
之日樂與哀半哀樂且相生哀誠又何闕焉

記襍記有三季之練冠則以大功之麻易之唯杖屨不
易鄭元云言練冠易麻互言之也唯杖屨不易言其餘
皆易也范宣說母器旣練遭降服大功則易衰以母服
旣練衰八升降服大功衰七升故尋易之其餘則否魏
頴說大功布三等先儒以此爲降服大功七升若正服

大功又同則不易此變受之通例賀瑒說其三等大功
衰雖七升八升九升之布有細亏三季之練衰以其新
器之重故皆易之庾蔚之說唯降服大功衰粵易三季
之練以周案器中易服兼服必新器之冠衰經帶有麤
亏本器者若冠衰升數同卽不易祇變經帶而已經帶
之大小同可易其餘亦否故閒傳小記言斬齊大功經
帶變受之節必曰麻同則兼服之此通例也范魏據通
例爲言其意斬衰旣練七升與降服大功同不易齊衰
旣練八升與正服大功同亦不易惟三季母器降服大
功其例爲然而近儒駁之者以爲服間曰小功不變器

之練冠似三等大功皆變也如正服大功已不易練冠服問何以云小功不變襪記亦不舁渾言以大功之麻易之賀氏謂大功新器重故易舁服不必計升數多寡服問曰殯長中變三季之葛終殯之月算而反三季之葛下殯則否是其例與記云唯杖屨不易孔疏云是衰亦在易中徐健庵通考謂古人變易不過經帶而已衰與冠不變亦誤

程瑤田云襪記有三季之練冠則以大功之麻易之此大功易練冠之例也有父母之器尙功衰而耐兄弟之殯則練冠此小功殯練冠而耐之例也知爲小功殯者

小功以下爲兄弟故謂其殯爲兄弟之服服問曰殯長
中變三季之葛今日練冠耐殯則是齊衰親之下殯降
在小功及大功親之殯降在小功以下者鄭注乃以爲
大功之親爲殯在總小功者旣誤解殯服中從上下之
說又不以兄弟爲小功以下之服名而曰冠而兄爲殯
謂同季者兄十九而歿明季因器而冠意蓋謂必如是
乃昇冠而耐其兄之殯恐記意未然也凌曙云大功親
之殯在小功猶可以變三季之葛若齊衰親之下殯降
在小功則器服小記所謂下殯小功帶澡麻不絕本鄭
注以爲本齊衰之親記所云云者明親重也此可以練

冠祔之乎服問曰麻之有本者變三季之葛今塲小功章澡麻正是麻之有本者此豈不變三季之葛乎以周案程氏器服足徵記說多紕繆凌氏駁之甚詳

右兼服

戴德說禮童子當室謂十五至十九爲父後持宗廟之重者其服白浹衣不裳能服者亦不禁衰經鄭元云當室謂無父兄而主家者也劉智說嬰兒無知亏父母之器則以衰抱之其餘親八歲則制服矣庾蔚之說童子者八歲以上笄射慈以爲未八歲者服其近屬布浹衣或合禮意孫惠蔚云童子冠杖之節有降成人衰麻之服略爲不异玉藻鄭注云童子雖不服總猶免浹衣是

許其有裳但不殊上下又童子服總猶免浹衣況居斬而反無裳乎又注云無麻往給事是往則不麻不往則經如童子本自無麻以禮襲首聽與不聽俱闕兩經唯舉無麻足明不備豈尋言聽事則不麻乎以周案當室謂無父兄而主家鄭注甚是敖氏謂有父在大謬記童子唯當室總鄭注謂與族人爲禮戴君以童子爲十五以上蓋謂十五以下不能與族人爲禮也總服輕不能爲禮卽已若斬衰之器雖褻抱亦以衰齊功之器能勝衣斯衰矣爲昆弟下殤在小功服昆弟者其季有幼亏下殤者矣玉藻言童子無總服聽事不麻明小功以上

皆服其衰而加麻也知小功以上本服衰經則不總之
童子卽謂十五成童何害也自說者謂童子之節事降
成人姑姊之器不服功衰徐整說父母之器免而不經馮熙
事而申之者乃以童子爲八九歲之幼子矣抑知藐爾
幼子豈能聽事給役乎亏本文殊悖矣孫氏謂童子有
經甚明其謂童子有裳恐未然也曲禮云童子不衣裘
裳故舊說云爾右童子服

記檀弓云始死羔裘元冠者易之而已鄭元云養疾者
朝服王肅本家語據弔者言黃韎弔服圖說主人未小
斂弔者易羔裘元冠裼裘而弔同王肅說以周案元冠

羔裘不以弔據大斂以後言毳服小記云諸侯弔必皮
弁錫衰主人未毳服則君亦不錫衰是則主人未小斂
大夫朝服可也賀循毳服襲記云大夫弓始歿而弔朝
服褐裘如吉時當斂而至則服皮弁之服以襲裘主人
成服而往則皮弁經而加錫衰是也王肅改定家語未
可據信

鄭元云弔者小斂則改襲而加武與帶經矣武吉冠之
卷也加武者明不改冠亦不免也賀循云主人既繫冠
繫弁故弔者加繫弁弓武熊安生說加武帶經謂以經
加弓武連言帶耳以周案凡弔服首環經檀弓主人既

小斂子游襲裘帶經而入與大記弔者襲裘加武帶經
文同帶經者環經之別名也古襲經用麻一條其束身
處別以麻周環纏之不絞詳前絞與環經之形相同故
環經亦謂之帶經謂其首經如帶形纏而不絞也加武
與帶經與猶以也謂加其武以環經諸說皆非

禮家說弁而加經皆以麻劉歆云王爲諸侯總麻弁而
加環經同姓則麻異姓則葛以周案檀弓言弁經葛而
莽是弁而加經不盡以麻劉說自有所本

鄭元云襍記凡弁經其衰侈袂侈猶大也袂之小者二
尺二寸大者半而益之則侈袂三尺三寸孔穎達云謂

弔服也士衰不侈故周禮司服有元端絜端注云變絜服言絜端者明異制大夫以上侈之明士不侈故稱端以周案凡五服之衰其袂皆屬幅方正自天子下達故襍記曰端衰無等此云凡弁經其衰侈袂以弔服言士弔服絜冠加經其衰亦屬幅方正大夫以上弔服絜弁加經其衰侈袂云凡弁經其衰侈袂明士冠不弁袂亦不侈也舊說大夫以上弔服侈袂是已或以此爲五服之衰非

戴德說君弔亏卿大夫錫衰弔亏士疑衰皆服絜弁加經明日主人衰經拜謝亏朝君若使人弔其服疑衰絜

裳絜冠諸侯相弔則錫衰皮弁加經同國大夫相弔錫衰絜冠加經朋友弔服有經經大與總麻經同既落而除同國之士相弔朝服加經鄭元云周禮凡弔當事則弁經弁經者如覆弁而絜加環經也其服有三錫衰也總衰也疑衰也王爲三公六卿錫衰爲諸侯總衰爲大夫士疑衰諸侯及卿大夫亦以錫衰爲弔服當事乃弁經否則皮弁辟天子也士以總衰爲喪服其弔服則疑衰也舊說以爲士弔服元上絜下或曰絜委貌冠加朝服論語曰緇衣羔裘又曰羔裘元冠不以弔何朝服之有乎此實疑衰也其弁經皮弁之時則如卿大夫然又

改其裳以絜辟諸侯也朋友之相爲服卽士弔服疑衰
絜裳冠則皮弁加經庶人不褻弁則其弔服絜冠委貌
檀弓孔疏云庶人弔服鄭注不顯所著之服文承疑衰
絜裳之下則庶人亦用疑衰或者庶人布浹衣絜冠委
貌司服賈疏云庶人疑賈公彥說士與庶人弔服同冠
衰絜裳與士同而冠異弁則異諸侯弔服亦錫總疑三衰俱有弔大夫錫衰弔
同姓士總衰弔異姓士疑衰士之弔服不用錫衰者辟
大夫疑衰不用疑裳者辟諸侯也以周案麻不加於采
凡弔服弁經如褻弁而絜非卽褻弁也其弔異國之臣
用絜皮弁無會采諸飾注中言皮弁加經非卽皮弁也
鄭所破舊說卽戴德說司馬溫公言士大夫弔器可服

公服仍沿是誤凡弔服錫總疑諸衰皆用麻當事又加
絰弓冠弁朱子家禮弔服用白生絹亦不合禮鄭所謂
繫委貌者如元冠而繫也元冠不以弔器主繫吉主元
凡弔服以主人之服爲節始死主人笄纓浹衣弔者襦
裘或朝服小斂後主人變而袒髻髮弔者襲裘帶絰或
皮弁成服而後主人斬衰弔者疑衰或錫衰經注所言
當事及不當事弔服條目煩細今撮其總要蓋主人未
小斂時天子哭諸侯以醵弁諸侯哭大夫以皮弁尙用
吉服旣小斂後首服弁絰而衣仍用吉不用衰旣成服
後斯用衰以弔而天子弓大夫士疑衰首服一以弁絰

諸侯亏大夫錫衰而首服當事用弁經不當事用絜皮弁有异諸侯亏同姓士總衰异姓士疑衰又不論當事不當事而一以絜皮弁士之有朋友之恩者往則錫衰大夫兩相爲如諸侯之亏大夫大夫亏士如諸侯之亏士士之有朋友之恩者往則弁經士以總衰爲褻服其弔服則疑衰其兩相爲當事弁經不當事絜皮弁亦如諸侯之亏大夫所异者其裳以絜目未成服以弁所謂當事者指大小斂旣成服之後所謂當事者將葬啟殯是也未成服以弁所謂當事之皮弁指衣言時首冠弁經而身衣皮弁服猶未變吉也旣成服之後不當事之

皮弁指冠言時身服褻服而首冠繫皮弁亦有舛吉也任氏釋例云褻服小記諸侯弔必皮弁錫衰云錫衰是成服後也云皮弁則成服後弔異國臣之首服也禮記注諸侯及卿大夫亦以錫衰爲弔服當事則弁經否則皮弁上云錫衰下云否則皮弁是亦據成服後不當事之首服也士褻禮注君視大斂皮弁服襲裘不云衰則未成服以弔當事之皮弁服也攷司服王爲大夫士凝衰其首服則弁經是天子弓士旣成服來弔身服疑衰而首冠弁經諸侯弓士則無論成服未成服當事不當事首皆皮弁蓋天子弓三公六卿諸侯大夫士

皆弁經天子至尊靡所不伸也諸侯惟亏大夫弁經亏士皮弁亦所以辟天子也禮器服記注諸侯及卿大夫亦以錫衰爲弔服當事則弁經否則皮弁辟天子也

孔穎達云文王世子注云君亏卿大夫錫衰亏士蓋疑衰同姓則總衰以弔之此其常也士器禮注云往則錫衰者謂士有俊選亏君有師友之恩與常士不同故錫衰也或諸侯弔士無文因諸侯弔必錫衰有明文故以周案賈疏同孔焘說後一說非注意

鄭元云士器禮君若有賜焉則視斂斂大斂君視大斂皮弁服襲裘主人成服之後往則錫衰敖繼公云君視

斂朝服襲裘加絰與帶成服之後弁絰疑衰沈彤云服
問云公爲卿大夫錫衰以居出亦如之當事則弁絰但
言爲卿大夫不言士是爲士雖當事不弁絰也重服不
以弔微轂不弁絰則皮弁旣皮弁則亦皮弁服矣此皆
鄭是而敖非

鄭元云檀弓天子之哭諸侯也轂弁絰紵衣服士之祭
服以哭之明爲變也天子至尊不見尸柩不弔服麻不
加弓采此言絰衍字也時人問有弁絰因言之耳周禮
王弔諸侯弁絰總衰孔穎達云諸侯以下雖不見尸柩
仍弔服以周案古者哭弔本異服不以尸柩見不見而

別弔視主人當事不當事之節往有常期哭或出亏倉卒不行弔禮不必定用弔服其禮尋弔者或先哭之不遵以弔服如檀弓天子哭諸侯以黻弁是其禮不尋弔者雖哭之不終爲弔服如文王世子無服親哭之無服謂不爲弔服是襍記三季之器雖功衰不弔自諸侯達諸士如有服而將往哭之則服其服而往檀弓子張必曾子有母之器齊衰而往哭之曾子曰我弔也與哉皆明哭弔之異服

戴德說朋友弔服有經經大與總麻經同既葬而除賈公彥說凡弔服皆既葬除之萬斯同說服問公爲卿大

夫錫衰以居則弔服平居亦服也如待既葬而後釋則此禮行亏諸侯則可若天子之亏諸侯公卿大夫不知其幾皆至三月五月之葬畢而釋其勢有所不行也以周案朋友總麻故戴云爾檀弓云天子之哭諸侯也褻弁紒衣此爲畿外侯哭而不弔者言故用吉服所謂總衰弁經以弔者以當事言也平居爲畿外侯褻弁經內侯縗弁不尋援服問公爲卿大夫錫衰以居爲天子例且服問云當事則弁經明弁經唯當事之弔爲然鄭注弁師亦云弁經王弔所服明平居縗弁不加經也賈疏謂天子常弁經更誤凡弔服不過總

弔服有錫衰總疑衰鄭眾說錫麻之滑易者十五升
去其半有事其布無事其縷總亦十五升去其半有事
其縷無事其布疑衰十四升衰鄭元說無事其縷哀在
內無事其布哀在外疑之言擬也擬亏吉譙周說用總
麻布而夾理之曰錫衰疑衰又用錫布為衣而縗裳擬
亏吉也其冠各以其衰一說錫衰總疑衰疑衰皆用七升
半之布一說錫總疑三衰皆用十四升半之布有事其
布曰錫有事其縷曰總布縷兼有事曰疑以周案總錫
之布見器服記及襍記先鄭據以為說疑衰無明文諸
家各以意言後說為通

記檀弓子張次曾子有母之喪齊衰而往哭之或曰齊衰不以弔以其無服非之也曾子曰我弔也與哉鄭元云亏朋友哀痛甚而往哭之非若凡弔孔穎達云此論哭朋友失禮之事以周案禭記三季之喪雖功衰不弔自諸侯達亏士如有服而將往哭之則服其服而往此言身有三季之服者不弔人器惟有服之人尋往哭之也注疏以朋友無服無往哭禮故以爲失白虎通義引此事云子張者朋友有服雖重服弔之可也不以爲失禮之事朋友弔服加麻非純無服也云重服弔之可也則禭記服其服亦謂服己之重服非新次者之服矣曾

子齊衰而往哭之卽所謂將往哭之則服其服也曰我
弔也與哉明弔與哭有別也弔輕可止哭重難已曾子
之事與襍記正合然則曾子問篇孔子曰三季之罋而
弔哭不亦虛乎哭字衍也上文問辭亦止曰弔不及哭
不然曾子旣以此問夫子矣豈猶身爲非禮

罋服記大夫弔亏命婦錫衰命婦弔亏大夫亦錫衰鄭
元云弔亏命婦命婦歿也弔亏大夫大夫歿也萬斯同
汪琬等說婦人無外事安尋與大夫行弔禮如其爲有
服諸親又安尋用錫衰以周案禮知生者弔弔亏命婦
命婦歿而弔其夫也大夫與大夫相知故弔弔亏大夫

大夫成而弔其妻也諸命婦時會亏君所亦相知故弔
鄭注本明且大夫弔命婦亦見服問夫人弔大夫士王
后世婦弔諸侯卿大夫橄見亏經者尤多有何疑焉其
弔服錫鞵不弁絰惟吉筭無言縗總而已

右弔服

鄭元云日月已過乃聞器而服曰稅大功以上然小功
輕不服若在五月之內追服王肅說隄內聞器但服殘
月小功不追以恩輕故也若方全服與追何異以周案
鄭注稅訓爲追服盧植注禮服虔注左傳竝同肅說無
據小記降而總小功者稅之注云正親在齊衰大功者
是大功以上稅服之證也奔喪聞遠兄弟之喪既除喪

而后閭閻免袒成踊拜賓則尙左手注云尙左手吉拜
是小功不稅服之證也檀弓曾子曰小功不稅是遠兄
弟終無服也其可乎注云據禮而言疏云而可乎言其
不可唐韓退之申言小功不追服之不可而疑稅非追
服之名乃傳注失其宗朱仲鈞申韓意以爲稅卽服問
有本爲稅之稅稅變易也喪器未畢復遭後喪以後喪
之麻變喪器之葛是謂之稅小功不稅與小功無變義
同其說本之林氏來義但據小記已除喪而後閭閻則
不稅從而服不從而稅及檀弓小功不稅是遠兄弟終
無服諸文稅爲追服之名其義甚顯朱氏自知其說不

可通謂春秋時已誤不稅爲不追服是何說也林氏云禮之小功不稅者謂先有重喪後遭小功不以小功之服變其弔喪而末俗見遭喪者不變後喪之小功遂疑其日月已過卽不爲服故曾子如其言以諷之其說較穩

記喪服小記生不及祖父母諸父昆弟而父稅喪已則否鄭元云父居異邦而生已不及此親存時歸見之今其死亏喪服季月已過乃聞之父爲之服已則否王肅說計己之生不及此親之存則不稅若此親未亡之弔而已生則稅之也昆弟者諸父之昆弟也劉智蔡諱

等說生不及者謂彼已沒己乃生耳弟衍字庾蔚之說
己謂死者爲昆則謂己爲弟己不能稅昆昆亦不稅己
虞喜說父在異邦生己後娶居一邦生弟以周案小記
云降而總小功者稅之注正親在齊衰大功者則大功
以上追服也祖父母諸父昆弟皆期何尋以生不及歸
見遂不追服魏淳亏纂辨之已詳見通典此鄭注之可疑
也祖父母爲一本之親諸父昆弟爲旁親如祖父母以
生不及可不稅則諸父昆弟亦復何疑王肅亏諸父下
增一之字殊可不必蔡庾諸說空亏昆弟生議亏不追
服之疑終未釋然朱仲鈞說稅卽有本爲稅之稅謂變

服也生不及奔此親之喪至虞卒哭後其父在家已變麻服葛而已始歸必三日成服以申親親之義不忍以父之稅而亦稅也說亦迂回竊謂喪服記不及知父母與兄弟居加一等此云不及與喪服記文同不及知父母者父母早卒也生不及祖父母者祖父母既卒而後生也凡喪服皆生及者爲之其不及者無服道也鄭注今其歿亏喪服季月已過乃聞之此乃不及之正義不及歸見句可刪亏己生時已過祖父母諸父昆弟喪服季月嫌其父稅喪而子亦從服故著之曰己則否兼言弟便文爾經有此例

右稅服

王肅說改葬總既虞而除之傳純難之云夫葬以藏形
廟以安神改葬之神在廟久矣安得退之亏寢而虞之
乎以周案傅氏說是

春秋穀梁傳改葬之服總舉下緇也范甯云言舉下緇
上從總皆反其故服因葬桓王記改葬之禮不謂改葬
桓王當服總也江熙曰葬禮總舉五服之下以罽緇藋
遠也天子諸侯易服而葬以爲交亏神明者不可以純
凶況其緇者乎是故改葬之禮其服唯輕言緇釋所以
總也以周案江氏說是

戴德云改葬制總麻具而葬葬而除謂子爲父妻妾爲

夫臣爲君孫爲祖後也無遺葬之禮其餘親皆弔服馬融云其葬如大斂從墓之墓事已而除不必三月期以下無服鄭元云改葬謂墳墓以他故崩壞將亾失尸柩者也服總者臣爲君子爲父妻爲夫三月而除之趙商云當待三月除以順總之數蔡諱說改葬斬衰禮言總者謂總親以上皆反服也傳云不以兄弟之服服至尊者謂總親不以兄弟之服服至尊者乃始罷正服目且斬于濟說不以兄弟之服服至尊者乃始罷正服目且斬衰之末僂自編冠麻衣乃輕于總麻然猶以服至尊矣韓愈云經次五等之服小功之下然後簪改葬之制更無輕重之鑒以此知惟記其最親者其他無服則不記

也若主人服斬餘親各服其服則經亦言之不當惟云
總也子思之對文子則曰既葬而除之今豈如何曰自
啟至亏既葬而三月則除之未三月則服以終三月也
以周案韓子申鄭甚精

右改葬服

傳苴杖竹削杖桐變除禮云削杖削之使下方者取母
象亏地故也王肅云削爲四方杜預云員削之象竹司
馬光云削杖上員下方以周案杖各齊其心其大如經
經圓杖亦圓竹圓物桐用把桐亦圓物也削者謂去其
皮非削之使方苴削互文竹杖曰苴明桐杖之削而白
也桐杖曰削明竹杖留其青黑之皮不去也凡杖必圓

乃僂手持故用桐竹變除禮謂削桐使下方已失經意
聶氏圖桐杖全身皆方更謬 又案桐竹二杖齊斬之
別也問器篇爲父苴杖爲母桐杖以斬齊分言之父母
字不可泥疏家謂杖父竹圓象天杖母桐方象地則母
爲長子桐杖又何義乎古人止有竹桐兩杖俗說夫妻
相杖用半槐尤屬不經

記小記經綬五分而太一杖大如經鄭元云如輿經敖
繼公云二杖皆如首經之度以周案經指輿經當從鄭
如屬首經則綬五分而太一語無著矣斬衰輿經之大
七寸二分齊衰輿經之大五寸七分六釐

說詳前則竹杖

之徑約二寸二分八釐桐杖之徑約一寸八分三釐
器服傳言婦人童子不能病不杖而記問器言童子當
室杖器大記言君之器夫人世婦杖大夫之器主婦杖
士之器婦人皆杖小記亦言婦人不為主而杖者姑在
爲夫杖母爲長子削杖女子子在室爲父母其主器者
不杖則子一人杖賀循雷次宗說小記婦人不為主而
杖者姑在爲夫唯箸此一條明其餘不爲主者皆不杖
賈公彥說童子不杖謂庶童子當室則杖婦人不杖謂
童子婦人成人則杖金榜說婦人唯爲主者杖不爲主
者不杖士之器婦人皆杖謂主婦皆主人而杖不尋下

通眾婦人沈彤說童子不杖包女子言子一人杖謂
長女非長女不杖有主器者皆不杖矣婦人謂異姓來
嫁之婦以周案器服傳言杖以優寵或以擔主此杖之
可卽位者也其無寵非主而尋杖者祇以扶病而已不
敢卽位故小記云庶子不以杖卽位大記亦云子皆杖
不以卽位況不能病之婦人童子其尋卽位用杖乎故
大記言夫人世婦祇尋杖弓其次卽位則使人執之此
其常也若問器言童子當室杖亦以其爲主而擔之也
是則婦人亦有擔主而杖卽位者矣小記又言婦人不
爲主而杖者三此又其變也天下惟通變者能守常

又案傳云杖者何竅也無竅而杖者擔主也非主而杖者輔病也謂此杖初爲有竅者設其後乃生擔主之義又其後乃生輔病之義凡擔主者可以杖卽位輔病者祇以杖亏次卽位則使人執之不敢杖若旣不爲主又不能病之童子婦人亦何杖之有傳意本明白杖卽位杖亏次二者不分說遂膠轕雷次宗以爲器服妻爲夫妾爲君女子子在室爲父女子子嫁者反在父室爲父如傳所云婦人者皆不杖小記惟簪姑在爲夫一條明其餘不爲主者皆不杖殊不恩姑在尙爲夫杖則妻爲夫杖是通禮矣尙尋謂妻爲夫不杖乎女子子在室與

嫁而反者其爲父母未可概曰不病器大記君之器三
日子夫人杖熊氏云子杖通女子子在室是也雷謂不
爲父杖亦未見其是賈公彥等以婦人不杖爲童子婦
人引小功章丈夫婦人之長殯以證未成人之女殯稱
婦人殊不恩傳云童子何以不杖不能病又云婦人何
以不杖亦不能病明婦人非童子也沈金說亦未尋
開元禮三日成服唯適子及有衾之庶子皆尋杖卽位
其庶子無衾者杖亏他所不杖亏位政和禮庶人器儀
亏成服時贊者引主人以下俱杖各就位內外皆哭盡
哀童子婦人不杖以周案器有杖卽位杖次之分又有

輯杖太杖授人杖之別器大記言此最詳杖以優廢亦以擔主其無廢非主之子不以杖卽位記有明文政和禮何混幪也且器服傳言婦人不杖亦謂不杖亏位且居次亦杖也政和禮之疏舛不及開元禮遠甚此特其一端也 又案禮三日成服杖而除杖無明文小記云虞杖不入亏室耐杖不升亏堂士虞禮宗人告有司具主人入門卽位亏堂卽倚杖是卽位之杖至虞耐除也而在次猶杖小記云練筮日筮戶視滌皆喪經杖繩屨有司告具而后太杖又云有司告事畢而后杖送賓是在次之杖練猶未除

凡卜筮有司先告具後告畢與士器禮卜日文同林氏求義誤駁注

疏不可信鄭注士虞因虞杖不入亏室而推之練杖不入亏

門門謂中門其注闕傳又以衰側杖云大祥太衰杖蓋
衰杖相連用同時除亦同時也但大祥之祭用吉服則
大祥之朝已太杖矣書儀家禮亏大祥奉主入祠堂之
後乃太杖非祔而用杖與祔不升堂之文尤違

右杖

孔穎達云徒從有四一是妾服女君之黨二是子從母
服亏母之君母三是妾子爲君母之黨四是臣從君而
服君之黨此四徒之中唯女君雖物妾猶服女君之黨
其餘三徒所從匹則已以周案鄭注小記從服者所從
匹則已云若爲君母之父母昆弟從母也注大傳有徒

從云臣爲君之黨當以小記注爲正臣從君而服君之黨雖所從者亾又當從新君而服之不可謂所從亾則已也

右從服

禮家舊說諸侯絕期大夫絕總以周案此亦絕其旁親
目服問云君所主夫人妻大子適婦適婦之服大功而
君主之矣喪服庶子爲父後者爲其母總義通大夫是
大夫亦有總矣林氏來義云正統之服雖天子諸侯卿
大夫皆依本服所尋絕尋降者旁親而已然亦惟天子
旁親盡絕諸侯則尊同者不絕始封者不絕大夫視
君爲卑則不敢絕而降且并不敢降其宗

右絕服

受業泰州盧永古
仝校